

蘇州府志


廿四

卷之五十八	卷之五十九	卷之六十
人物十二	人物十三	人物十四

漢書門	九〇八三
類	一〇八三
號	三四
函	三二
架	三二
冊	三二

內閣文庫	
番號	漢 9083
冊數	32 (24)
函號	292 13

內閣文庫	九〇八三	漢書
類	一〇八三	冊
號	三四	架
冊	三二	函
架	三二	冊
冊	三二	架



蘇州府志卷第五十八

人物十二

崑山縣 新分新
陽縣人物附後

淺草文庫

漢

卞崇妻縣人漢桓帝時太守薛固為法吏所枉下廷尉崇與同

郡烏程錢讓詣闕稱冤廷尉囚崇等以兵圍守苦毒持之崇

讓恬然自若枉聲彌厲天子聞而奇之乃赦固罪盧志

晉

張冲字叔元仕陳為左中郎將非其好也乃覃思經典撰春秋

義略異於左氏七十餘事喪服義三卷孝經義三卷論語義

十卷前漢音義十二卷官至漢王侍讀隋書 按冲傳但云
吳郡人今以其子後

允唐書著為崑山人故入崑山

唐

張後允字嗣宗崑山人祖僧紹梁零陵太守父冲陳國子博士入隋為漢王諒并州博士後允甫冠以學行禪其家高祖鎮太原引為客以經授秦王義寧初為齊王文學封新野縣公武德中擢員外散騎侍郎賜宅一區太宗即位進燕王諮議從王入朝召見初帝在太原嘗問隋運將終得天下者何姓荅云公家德業天下繫心若順天而動自河以北指撫可定然後長驅關右帝業可成至是自陳所言乃賜燕月池帝令羣臣以春秋酬難帝曰朕昔受大誼於君今尚記之遷燕王

府司馬出為睦州刺史乞骸骨帝見其強力問欲何官因陳謝不敢帝曰朕從卿受經卿從朕求官何所疑後允頓首願得國子祭酒授之永徽中致仕加金紫光祿大夫朝朔望卒年八十三贈禮部尚書諡曰康陪葬昭陵孫齊邱朔方節度使東都留守諡貞獻

唐書

史德義崑山人咸亨初隱居武邱山以琴書自適或騎牛帶瓢出入郭市號為逸人高宗聞其名徵赴洛陽尋稱疾歸公卿以下皆賦詩餞別德義亦以詩留贈其文甚美天授初江南道宣勞使周興表薦之則天徵赴都詔曰蘇州隱士史德義志尚虛元業履貞確謙渾彰於里閭孝友表於閨庭固辭徵

辟長往嚴陵之瀨多謝簪裾高蹈愚公之谷博聞強識說禮
敦詩繕性邱園甘心畎畝承天革命建極開階寤寐星雲物
色林壑順禎期而捐薜帶應休運而解荷裳粵自海隅來遊
魏闕行藏之理斯得去就之節無違風捺可嘉啓沃攸佇特
宜優獎委以諫曹可朝散大夫後周興伏誅德義坐為所薦
免官以朝散大夫放歸邱壑自此聲譽稍減舊唐書

張承休後允孫張說撰其墓誌云後允之子小師小師生承休
承休希言篤行去華崇實非法不由非禮不動精於理物敏
於從政歷朝議大夫上柱國恒州刺史說之文曰閭門一分
暉我諸侯蓋居閭門云吳郡志

陶峴彭澤之子孫也開元中家崑山富有田業擇家人不欺而
了事者悉付之身則泛遊江湖往往數歲不歸見其子孫成
人初不辨其名字峴文學可以經濟自謂踈脫不謀宦游生
通八音撰樂錄八章以定其得失自製三舟備極堅巧一自
載一置賓一貯飲饌客有前進士孟彥深進士孟雲卿布衣
焦遂各置僕妾共載峴有女樂一部奏清商曲逢奇遇興則
窮其境物興盡而行名聞朝廷值天下無事經過郡邑無不
招延峴拒之曰某麋鹿閒人非王公上客亦有未招而詣者
吳越之士號為水仙其澤謠
張鑑字季權一字公度後允五世孫朔方節度使齊邱子鑑以

蔭授右衛兵曹參軍郭子儀表爲元帥府判官遷累殿中侍御史乾元初華原令盧縱以公事譙責邑人齊令詵令詵宦人也銜之構縱罪鎰按驗當免官有司承風以死論鎰不直之乃白其母曰今理縱縱必免死而鎰坐貶默則負官貶則爲太夫人憂敢問所安母曰兒無累於道吾所安也遂執正其罪縱得流鎰貶撫州司戶參軍徙晉陵令江西觀察使張鎬表爲判官遷屯田右司二員外郎居母喪以孝聞大歷初出爲濠州刺史政條清簡延經術士講教生徒比去州升明經者四十餘人李靈曜反於汴鎰團閱鄉兵嚴守禦有詔褒美擢侍御史緣淮鎮守使以最遷壽州刺史歷江西河中觀察

使不閱旬改汴滑節度使以病固辭詔留私第建中二年拜中書侍郎同中書門下平章事郭子儀壻太僕卿趙縱爲奴告下御史劾治而奴留內侍省鎰奏言貞觀時著令奴告主者斬頃悖慢成風漸不可長今縱事非叛逆而奴留禁中獨下縱獄情所不厭帝納之杖奴死盧杞忌鎰剛直欲去之時朱泚以盧龍卒戍鳳翔帝欲擇人以代杞卽謬曰鳳翔將校班秩素高非宰相信臣不可鎮撫臣宜行帝不許乃顧鎰曰文武兼資內外望重無易卿者其爲朕撫盧龍士乃以爲鳳翔節度使鎰知爲杞陰中然辭窮因再拜受詔帝幸奉天鎰罄家貲將獻行在而營將李楚琳者嘗事朱泚得其心司馬

齊暎等謀曰楚琳必爲亂乃遣屯隴州楚琳知之夜率其黨作亂鎰縋城走不及遠與二子爲候騎所執楚琳殺之贈太

子太傅

唐書

宋

龔宗元字會之祖慎儀邵武人南唐給事中爲盧絳所害父識字默甫始徙吳登端拱三年進士第大中祥符中翰林學士李宗諤薦擢監察御史遷殿中侍御史兼左巡使宋襲唐制御史不專言職至是始擇學術醇正操履端方可綱紀朝廷者俾入臺言事蓋自識始逾年以目疾求退除檢校司封郎中平江軍節度副使宗元幼穎悟絕人讀書虎邱寺爲鄉貢

首選天聖五年擢第主杭州仁和簿以父疾乞便侍養調吳縣改建安尉以薦擢大理評事知句容縣發摘姦伏如神明楊紘持使節號爲深酷過縣境獨不入或問其故紘曰龔君治民所至有聲吾往徒爲擾耳歷通判衢越二州官至都官員外郎後徙崑山黃姑謝事家居作中隱堂時屯田員外郎程適太子中允陳之奇皆以耆德致政日爲文酒之樂吳人謂之三老宗元初官仁和時范仲淹爲帥謂之曰君器業清修他日必爲合器慎勿因人以進洎登朝未嘗游公卿門皆仲淹之教也子程字信民剛正自守不怵於禍福力排異端家不設佛老像祭祀不焚紙錢幼讀書南峯山攻苦食淡遂

博極羣書鄉人號有脚書尉熙寧六年第進士終桐廬令程子況字濬之崇寧五年進士入館以學術文章與蘇過俱知名時號龔蘇用宗元起隱故事自號起隱子終祠部員外郎

有起隱集三十卷

中吳紀聞吳郡志盧志合纂按宗元雖徙崑山實吳縣人也以其子孫皆居崑山

故從縣志併為一傳入焉

孫載字積中曾祖漢英仕錢氏為崑山鎮防邊使遂為縣人載登治平二年進士第為河中府戶曹更三守皆立威嚴者載獨與爭曲直不肯少下終以此見知中書檢正官察訪關中辟為官屬青苗法行乾祐令不以予民察訪怒檄載按之載還言邑小民貧其徒歲以黍麥博易為生未知稱貸公家為

利令無罪用薦知德清縣聽斷精明不專任刑罰訟有累年不決者得一言皆感悟相捨去熙寧八年吳越饑獨縣中熟載勸大家倍糴得十五萬斛明年春米價騰踊載使平直以糴全活甚眾移考城縣地多盜載明賞格嚴保伍一日巡尉來告盜集境上將以上元掠近郭至期載張燈設宴不禁夜如故事盜叵測遂遁去訖受代無復盜者神宗以載姓名付中書除廣東常平觸暑行部以宣德意元祐初遷廣東轉運判官紹聖初知海沂二州再知婺毫二州為治務持大體時號循吏以嘗薦元祐黨人授提舉洞霄宮大觀中以朝議大夫致仕一日遍謁先壟及嘗往來者未幾疾革問日早晏盥

手焚香而逝年七十五載天資樂易長於吏治薦士至四百餘人後多知名少喜讀易著易釋解五卷文集五十卷

中吳紀聞

盧志合纂

馬友直字伯忠其先本司馬氏有名球者仕吳越以御史中丞為崑山鎮遏使因家焉子孫止稱馬氏聚族於邑之全吳鄉六直里以孝義著稱兄弟六人皆力穡獨友直以儒業自奮入太學元符二年薦春官與李廌遊廌知友直賢以兄之子妻之宣和水災全吳之田與江通兄弟皆狼狽營妻子友直獨迎其親徙邑之進賢里僦屋以居躬養菽水母子晏如建炎二年以累舉得官主武康簿監南嶽廟卒

吳郡志

孫察朝議大夫載之從子父臨大理評事察以朝散郎奉使金

國守節不屈金人裹以油絮焚之罵聲不絕口而死

盧志

王葆字彥光崑山人祖申以學行推於鄉父億樂道好善贈右中散大夫葆幼有志識弱冠通諸經宣和六年擢進士第崑山自孫載登科後六十年葆始繼之紹興改元上疏陳十弊深中時病末言儲嗣尤切直謂仁宗時中外無事海宇晏然而范鎮等為國遠計汲汲在此況今國步多艱人心易動強虜未靖羣盜陸梁天下之勢危若綴旒而甲觀之崇未聞流慶中外惴恐此為甚急臣願陛下為宗社無疆之計廣求宗室中仁明孝友時論所歸者歷試諸事以係人心執政讀而

奇之遂自麗水簿遷知宜興縣時兩淮用兵浙亦盜起邑當孔道僚吏懼乏軍興相次駭竄葆白父母曰食君祿無愛死理弟可終養母以葆爲念也明日取丞簿印兼佩之諸將妄求者面折力拒乃稍稍自戢歷監登聞院宗正寺丞遷司封郎官兼國子司業秦檜嘗語葆曰檜欲告老如何葆曰此事不當問葆檜曰他人不敢言以公有直氣故問耳葆曰果欲告老不問親讐擇可任國家事者使居相位誠天下生民之福檜默然除監察御史兼崇政殿說書出知廣德軍移守漢州綏善鋤奸境內大治擢瀘南安撫使知瀘州引用名士劾去貪殘吏數輩踰年遷池州孝宗召爲大理少卿以疾辭改

浙東提點刑獄權要不樂請祠歸宜興老焉官至左朝請大夫葆學行俱高潛心古道著春秋集傳十五卷春秋備論二卷教誘後生如親子弟沙隨程迥嘗從受經出其門者後多成立尤能鑒裁人物李衡布衣流落一見以女弟歸之周必大未第時亦妻以女范成大早孤廢業葆喻勉切至留之席下程課甚嚴後皆爲名臣

中吳紀聞吳郡志盧志合纂

龔明之字熙仲宗元曾孫幼逮事祖母李李自言少嘗大病夢神告曰與汝七十七及期果病且革明之夜禱於天乞減已五齡以益李壽灼香於頂者七聞腦中爆裂聲不爲動詰旦李病良愈又五年乃卒宣和三年明之以諸生貢京師迎父

母往已而母與弟相繼亡去鄉數千里貧無以歸葬或使以旅殯僧舍否則火之以其燼歸明之不從取其家所有自一錢之直皆折賣之不足又乞貸於人竟護二喪以歸先墓在西山大木數萬族人利其直悉斬而分之明之不能制獨泣且罵每伐一木仆明之輒號慟響震林谷紹興二十年鄉貢年已六十或勸少匿其數爲異日計笑曰吾生平未嘗妄語且不敢自欺卒書其實晚以特恩廷試授高州文學年逾八十法不應出官吳士在朝者列奏其行義敕監潭州南嶽廟淳熙五年乞致仕鄉人林振等又請之朝授宣教郎致仕仍賜緋衣銀魚時李衡以忠諫去國年幾八十德望絕人獨以

兄事明之時人高之目爲二老明之生平不摘人短不作貌言每自謂平日受用唯一誠字嘗附益山谷語以省喫儉用號五休居士撰中吳紀聞三卷子昱字立道有學行安貧樂

義鄉人師之

吳郡志盧志合纂

顏度字魯子充公五十三世孫自唐魯公真卿兄子顯爲常熟令其後遂爲吳人度居崑山登紹興進士第歷海門簿臨海令有去思乾道五年知長興縣遇事慈恕人不忍欺一日某王自寧國入朝舟次縣界皆以婦人挽轡王怪問之皆云知縣顏佛子愛惜民力縱男子耕種卒難召集恐累顏公故婦女悉當其役洎入對孝宗問卿治郡得人乎卽以度對召拜

監察御史遷太常少卿權工部侍郎知湖州江東京西運副
以中大夫秘閣修撰提舉沖祐觀封長洲縣開國男卒年七
十五度與朱熹友善孝宗謂度每出一言不動如山因以如

山自號云盧志

馬先覺字少伊友直孫以文章名登紹興三十年進士初主海
門簿調常州教授既歸時宰辟沿海制司幹官以先覺自重
難挽徑以名聞授兵部架閣朝奉郎素號高逸不事請謁出
為浙西常平幹官以承議郎主管台州崇道觀號得閑居士
所著詩文曰慙筆盧志

邊惇德字公辯祖珉始家崑山惇德幼孤至孝貧不廢禮才思

敏給以能詩名為范成大所知常與唱和五中鄉舉就奏名
年逾六十即致仕郡縣列上其行義特改通直郎撰脂韋子
五十卷子瀛字道卿與弟濟並有學行濟子應升字子用穎
悟力學篤守操履淳祐初特科進士盧志應升子實與凌萬頃

同修崑山志崑山舊志

范之柔字叔剛純祐曾孫乾道八年進士嘉定初拜監察御史
歷右正言左司諫起居中書二舍人刑禮二部尚書太子詹
事封崑山縣開國子之柔奉親事君一以文正為法知止畏
盈每有山林之志累章乞骸骨上諭宰臣曰為朕勉留將大
用之以禮部尚書致仕卒贈特進開府端明殿學士諡清憲

弟良遂初名之傳字次卿卜居崑山之車塘放情山水不慕榮利長於歌詩兄雖貴視之泊如也自號墨莊居士有詩集

十卷

盧志

吳仁傑字斗南一字南英其先從洛陽來居崑山父信修武郎仁傑博洽經史有俊才講學朱子之門登淳熙五年進士第歷羅田令國子錄自號蝨隱以詩文名一時所著古易十二卷兩漢刊誤補遺十卷禘祫綿菽書三卷周易圖說樂舞新書廟制罪言郊祀贅說鹽石論集古易尚書洪範辨圖陶淵

明杜子美年譜皆行於世

盧志

衛涇字清叔其先齊人唐末避亂遷華亭祖闔始占籍崑山父

季敏通判鎮江府涇少有異操從永嘉李去智學李卒爲制服執喪淳熙十一年擢進士第一授承事郎添差鎮東軍簽判涇以對策嘗陳添差之弊三上表乞待次上特從其請故事狀元初任垂滿必通謝於宰執始頒召命時王淮秉政涇不通謝雖被召三月不得引見十四年除秘書省正字輪對言陛下卽位之初銳意事功不次用將相痛憤以圖恢復乃二十六年之久無一事足以少稱陛下意者而陛下大有爲之志亦少弛矣一祖八宗之業太上皇付託之重子孫億萬年之基緒陛下一身任之豈可僅取苟安無事而已耶庸常之才持祿保身而風俗日壞士氣日卑民生日困天下之患

將有出於意慮之外者事機易失時不再來願陛下堅自強之志振紀綱以張國勢作氣節以厲媮惰則靜可以強根本動可以復土疆而事功立矣光宗初立政尙修謹涇以著作佐郎賜對言今日風俗頹靡百度縱弛人材削弱國勢未張汲汲有爲尙恐不濟若猶因循其弊將不可爲又言中國之與北虜其勢決不能兩立名爲和好實則仇敵名爲息兵實則觀釁復讐之志直須時耳今以偏方之勢與虜持久自紹興來五十年無大戰自隆興來三十年無小鬪虜酋新立血氣方剛間隙之生遠不過五六年願陛下奮發英斷規恢遠圖臥薪嘗膽不忘北鄉聖志先定然後與二三重臣講求大

計委任而責成之內治外備則大讐可復中興可期又言自陛下踐阼臺諫給舍多不得其職今日士氣向衰風采銷落陛下所當長養振作而反陰銷潛沮之將使羣臣上懼陛下之威命下虞羣小之中傷苟且成風諂諛充位脫有大奸巨惡誰爲陛下言者紹熙元年遷著作郎兼司封郎官二年正月震雷雨電大雪繼作涇應詔上封事言雷陽也雪陰也陽氣方升而陰制之此雪所以降也以象類而求則君欺於臣夫陵於妻夷狄謀中國小人害君子皆陰勝陽之證有一於此皆能致亂陛下不可不預防也時佞倖漸肆李后悍妬故涇以爲言出爲淮東浙東二路提舉慶元初召爲尙右郎官

上殿論壽皇孝養禮曠以爲太上之於陛下親父子也天性之愛慈孝之心宜無毫髮疑問雖太上疾勢未平語言舉動若未容於進見者然陛下孝心純篤豈以吾親之不可見而遂已乎願陛下兢業於中以親之未順爲憂以期於見親爲念積此誠意庶太上之懽心可得而喜付託之得人矣三年以起居舍人假工部尚書使金國還言虜有危亡之兆吾無自治之策使吾治具畢張備禦無缺敵雖強不足畏倘偷安歲月僅了目前一弱虜滅一強敵生未足以爲喜也初涇之往寧宗諭使覘國金爲蒙古所攻我有乘釁之意涇深懼其輕動故還奏如此除直煥章閣知慶元府沿海制置使以言

者論罷是時權奸用事涇不爲勢怵斥去十年不調於里中關西園取范文正公之言名其堂曰後樂開禧元年得旨入朝明年除中書舍人兼直學士院應詔論北伐非計不聽三年自吏部尚書拜御史中丞請誅韓侂胄論罷陳自强拜參知政事封崑山縣開國伯嘉定初兼太子賓客始侂胄之誅涇功居多旣又患史彌遠有專恣之漸欲去之彌遠知涇謀諷御史劾罷之出知潭州八年知隆興府上以涇三世同居有堂曰友順御書二大字太子亦書後樂堂榜賜之九年知揚州十七年進資政殿學士金紫光祿大夫致仕進封吳郡開國公寶慶二年卒理宗輟視朝一日特贈太師追封秦國

公謚文節涇歷仕三朝出入內外四十餘年憂國忘家始終一節謀深慮遠不邀近功其進退之際與時升降嘗語人曰官職自有定分名誼千古不磨故其在朝孤立自守不畏強禦以賢才爲立國之基薦進搜舉汲汲如不及如李燾輔廣倪思陳韓皆其人也在潭時與朱熹有交承之好侂冑指熹爲僞學斥之侂冑死涇奏召熹還朝而熹已卒復移文新安取熹四書諸經傳註刊刻以傳又請爲張栻賜謚其表章正學之力多矣別號後樂居士所著文章五十卷曰後樂集盧志趙琳字君善丞相忠簡公鼎曾孫父監字孺文范之柔以女兒妻之遂家崑山終知興國軍琳嘉泰中進士爲常州教授嘗

作亭表鄒浩墓歷宗正寺丞都官郎官理宗欲用爲諫官有沮之者出知吉州不赴勾祠歸後復以朝散大夫直寶章閣致仕題其居曰頓菴自號如舟清修寡欲室無勝妾惟藏書

萬卷卒年七十八

盧志

楊應龍字汝濟系出關西曾祖敏求仕徽宗朝官至朝散大夫徙居崑山之外岡應龍才兼文武爲戚里吳郡王壻寧宗朝授武功大夫浙西兵馬鈐轄暮年丐祠主管建寧府冲祐觀所著五十萬言名曰進授册嘉言讜論發於忠忱手抄六經百家之說爲性齋知見錄三十卷又有性齋詩王充黃由皆以將帥薦未幾卒子光輔終承節郎孫滋生有神異歿於邊

功理宗贈護國惠忠侯廟食里中盧志

王圭字君玉崑山人范成大外孫也父邁字德遠安吉人依妻

家以居登乾道進士第終通判太平州圭嘉定十年進士主

松陽簿以才幹陞為令講行經界為天下式淳祐八年以監

行在諸司糧料院出知常州屢蒙陞賞十年又以職事修舉

轉朝奉大夫再任在官五年入為司封郎官終朝奉大夫其

居官廉家無餘資自號靜觀子有文集十卷盧志

衛湜字正叔涇弟好古博學除太府寺丞將作少監皆不赴嘗

集禮記諸家傳註為一百六十卷名曰禮記集說寶慶二年

上之終朝散大夫直寶謨閣知袁州學者稱櫟齋先生盧志

陳振字震亨古靈先生襄之後父遵贅御史李衡女因家崑山

遵死振幼貧無以葬得地圓明村卜者云不利長子振曰使

親藏得寧或不宜於振二弟尙可主祭遂葬焉後振為紹熙

進士弟拱亦登端平科振以祿不逮養刻木為親像一飯必

祭平居急義樂善好汲引後進有過失必規正之為文簡健

高雅無宋季陋習有止安集五十卷好楷書有歐虞氣骨官

至太府丞知永瑞二州以朝議大夫致仕子昌世亦以文名

兼優吏事仕太府丞知信瑞二州有善政秩朝散大夫中歲

絕欲自奉菲薄居官所至有遺愛盧志按紹熙端平相距

逮養弟拱與兄相隔不當如此之久紹熙疑紹定之訛

劉必成字與謀其先福安人來居崑山之湓浦必成少遊國學
 嘉熙初七士同叩閣極言時事必成實為之倡是年七士俱
 預計偕而必成為武舉解元明年遂魁天下淳祐九年復中
 鎖廳蓋以文武全才自負也嘗兩入閣輪對慷慨言邊事上
 深褒美次日宣諭宰臣曰必成所言極好後皆行之歷知溇
 州卒官湖南安撫副使自號愛閒翁有三分詩稿盧志
 周津崑山人治詞賦端平嘉熙中郡府兩舉待補進士性介直
 好施與父天驥有疾津刲股以療又有曹椿年母病革刲股
 療之事聞借補承信郎節制司準使立孝感坊又咸淳八年
 有榮孝子亦以刲股救母立旌孝坊其後有張孝子皆同縣

市人也

盧志

凌萬頃字叔度號松臞景定間進士任直學博學多聞邑令項
 公澤重之請與邊實同修玉峯志行於世

周世昌崑山志

元

衛培字寧深文節公涇之曾孫性端確博通經史前代典故問
 無不知延祐七年郡府以培充貢試龍虎榜賦文不起草人
 謂有揚馬才時雖被黜識者推之知州王安貞聘訓導州學
 號月山先生所著文十卷曰過耳集又有李季高號蓉月性
 謹慎博洽羣書與衛培俱以隱德老於林下所著有蓉月集

周世昌崑山志

盧觀字彥達其先龍興武寧人五世祖徙平江再徙崑山祖鑑
 字明叔工詞賦父有常字元吉以隱約終觀少刻志於學受
 業湯彌昌錢重鼎之門客遊江淮間名卿鉅人有欲舉觀者
 力辭之隱居教授接人弗以貴賤異或加以非禮怡然不與
 較遇人患難必為盡心經畫事親溫清滄瀨不以貧故少缺
 暮年得羸疾猶手不釋卷母卒以不能行喪禮痛慕悲號病
 日增劇卒年六十五門人私諡曰夷孝先生所著有易集圖
 詩集說草翠軒文稿樂府聲調集總若干卷申屠衡銘
 文質字學古崑山人學行卓然詞章奇放為楊維禎所稱與盧
 觀趙天祐衛培盛德瑞范天與六人為邑中耆碩有司給廩

膳焉

江南通志

顧權字用衡其先自蘭谿徙居崑山父達卿與胡雲峯友善期
 有子當使為士及得權篤意教之權能力學博通羣典尤究
 心於易為文章刻意有古作者矩度一字不當不苟出遭時
 多艱隱居不仕為鄉校師卒無子知州僕侯斯為買地葬於
 馬鞍山北門人私諡靖夷先生姑蘇志
 秦玉字德卿其先鹽城人徙崇明再遷崑山父庚從方蛟峰學
 隱居不仕玉早孤即能刻志苦學既長博通諸經尤邃於詩
 不求仕進天性孝友事母與兄無違禮事無大小悉稟而行
 母有病湯藥必親嘗累旬不解帶及卒哀毀泣血終喪不沐

浴不鹽醋隣居失火家人各奔散玉獨憑棺號呼火遽滅所
著有詩經纂例學庸探說宋三朝類要齋居雜錄若干卷門
人私諡孝友先生

縣志

金至善字伯明居澱湖之陽修德樂施老而益力於學教導鄉
里多所成就自號菊逸老人有菊逸集

周世昌志

余日強字伯莊其先古田人父與可來居崑山日強篤志於學
淹貫經史奉母以孝聞號淵然叟有文集行於世

周世昌志

姚文奐字子章聰敏好學過目成誦博涉經史縉紳先生推重
之辟授浙東帥闔掾雖公事旁午不廢吟咏家有書聲齋野

航亭自號婁東生

周世昌志

顧德輝字仲瑛崑山人家世素封輕財結客豪宕自喜年三十
始折節讀書購古書名畫彝鼎秘翫築別業於茜涇西曰玉
山佳處晨夕與客置酒賦詩其中四方文學士河東張翥會
稽楊維禎天台柯九思永嘉李孝光方外士張雨于彥成琦
元璞輩咸主其家園池亭榭之盛圖史之富暨餼館聲伎並
冠絕一時而德輝才情妙麗與諸名士亦略相當嘗舉茂才
授會稽教諭辟行省屬官皆不就張士誠據吳欲強以官去
隱於嘉興之合溪尋以子元臣為元水軍副都萬戶封德輝
武畧將軍飛騎尉錢塘縣男母喪歸綽溪士誠再辟之遂斷
髮廬墓自號金粟道人及吳平父子並徙濠梁洪武二年卒

明史

瞿信字實夫崑山人自幼嗜學平居整暇無卒聲辟貌未嘗談人過惡食必男女異席衣冠非就寢不去兄智宦遊四方信養二親備至家雖貧恒忻忻焉兄卒孤兒女數人皆為婚姻教養至正間台寇作信負母避青龍海上築室曰閒野南臺御史李烈舉信孝廉不應卒

舊縣志

明

盧熊字公武觀之子元季為吳縣教諭江浙分中書省辟為掾張士誠敗以故官迫遣赴京母卒歸卜築玉山之南絕意仕進以薦起為工部照磨尋以善書擢中書舍人遷兗州知州

時兵革甫定民生疲瘵麗於辟者咸從輕典武臣將兵道充欲致伎樂拒却之太師李善長營魯王府又浚河自充至任城役夫幾二十萬熊竭心調度事集而人不擾會簿錄刑人家屬事坐累死時年五十先是熊嘗疏言州印篆譌充字乃類袞上以為無禮銜之至是竟得罪熊生平不治生產為政豈弟不求赫赫名少與弟熙皆從楊維禎游博學工文詞嘗纂修蘇州志窮搜極訪遂為一郡良史尤精篆籀所著有說文字原章句鹿城隱書蓬蠋幽憂石門清溪等集在充又有兗州志孔顏氏世系譜子彭祖字長嬰洪武末任武康丞丞樂初薦授禮部主事坐事謫阜城為民尋徵詣行在冠帶聽

用以疾卒彭祖幼傳家學不事藻麗惟求適用為政亦有父風彭祖孫瑛字克修宣德五年進士官刑部主事博學善書

尤工畫竹

姑蘇志參王志
堅崑山人物傳

盧熙字公暨熊弟洪武四年以薦授睢州同知時中原甫定歲復洊饑熙一意休息惟恐傷之明年行守事適御史奉命搜舊軍睢民濫入伍者千人檄熙拘送熙召民自實得嘗隸尺籍者數人畀之御史怒繫曹吏必盡得不則以格詔論同僚懼議發民應之熙曰吾民牧也民散吾誰與處乃自詣御史曰州已無籍軍今民且散走獨有同知在請以充役御史怒斥去堅立不動竟不能奪後卒於官貧不能喪官為具殮喪

歸吏民挽哭者塞道大雨無一人少却者熙為人雅飭信厚博涉經史亦善筆札子充穎字次農文學得於家傳而制行尤高以能書薦留誥司將官之會熊死歸葬誓不復仕充穎子儒字為已博學能文自負甚高亦以薦官中書舍人有重

齋稿

姑蘇志
參明史

殷奎字孝章一字孝伯其先自華亭徙崑山生數歲與盧熊同受小學長從楊維禎受春秋應江浙鄉舉不利屢聘不起有司延訓導州學洪武四年以薦赴京師試高等例授州縣職因母老請近地便養忤旨調咸陽教諭在任四年念母不置鬱鬱而死年四十六門人私謚文懿先生奎文章精審有法

尤深性理勤於纂述所著有道學統緒圖家祭儀崑山志成陽志關中名勝集陝西圖經婁曲叢稿奎二弟壁字孝連箕字孝揚俱明經篤於孝友奎卒壁間關數千里迎其柩歸箕舉秀才試廣西僉事終太平府推官

姑蘇志參
列朝詩集

秦約字文仲玉子至正間官崇德州教授洪武初應召試慎獨箴拜禮部侍郎以母老辭歸再徵詣京師上疏乞復書院書堂義學守令之選另立一科四十泣職百日舉代三年造冊與志書同進以備國史採擇上以約年老授溧陽教諭御史練則成待制吳沈薦約宿學遺老合在館閣不報在溧陽八年請老歸卒約文章務求理勝而詩尤工張翥貢師泰尤所

推重所著曰樵海集

姑蘇志

趙彥可崑山人洪武初為臨清知縣公勤寡欲好士愛民妻受民賂箠而遣之事聞陞知鞏昌府

明史

郭翼字義仲崑山人少從衛培學工詩尤精於易不屑為舉子業專志學古家貧不肯干謁自號東郭生生平以豪傑自負嘗獻策張氏勸其反元季貪殘舊政乘時進取若晏安逸樂精銳坐銷四方豪傑並起吳其必爭之地雖欲閉境自守勢將日蹙其可保乎士誠怒其言切直欲殺之其妻固止之乃得逸去洪武初徵授學官度不能有所自見怏怏而卒

列朝詩集

袁華字子英崑山人少穎悟不羣讀書一二過輒記誦不忘工

詩尤長樂府與顧阿瑛友善其家所藏書畫悉經品題楊維楨尤重其人以才子目之洪武初為郡學訓導後以其子為吏被罪坐累卒於京師所著有耕學稿姑蘇志

項駕字叔馭博涉經史精於春秋尤工詩文洪武初應秀才舉擢禮部郎中調官廣東政治廉平有聲於時崑山舊志

楊性字秉中博聞強記能詩早從楊維楨游楊以小鐵呼之嘗構一亭扁曰草元日鼓琴觴詠其中洪武初由秀才舉知祁

州縣志

傳鄰字次泉父翼嫻吏事鄰去吏為儒穎悟過人早從盧觀游得聞性命之學觀愛其勤以女妻之洪武四年進士為會稽


丞縣志

顧禮字元禮崑山人洪武五年以材幹擢刑部員外郎八年超遷本部侍郎九年以家屬極刑循例除名放還十一年再徵為戶部侍郎遷尚書十三年改刑部卒於官姑蘇志

陳則字文度家貧力學僦屋授徒以師範聞於鄉里洪武七年由秀才舉任應天府治中俄進戶部侍郎以閱實戶口調大

同府同知陞知本府則少與高楊張徐輩相倡和為北郭十友之一嘗賦紫菊詩得警句時呼陳紫菊張大復崑山人物傳列朝詩集合纂

易恒字久成其先廬陵人祖斗元宋咸淳進士為常熟尉攝警崑山因家焉素有風格人稱蓮峯先生恒能澡勵循其家範



洪武中應薦至京以老辭歸所居大泗瀼闢地數百弓引泉
莪花竹名曰泗園日嘯詠其中家貧不給視聲利泊如也所

著有陶情集

崑山舊志

余焯字茂本崑山人有雋才精春秋之學洪武十年以明經授
承勅郎十五年進通政司參議十七年拜吏部尚書奏准來
朝官明年正旦各造事蹟文冊仍畫土地人民圖以十二月
二十五日至京惟雲南遠邊特免又立吏員撥用法學錄金
文徵畏祭酒宋訥嚴與同官田子貞等誣訥罪喉焯移文令
致仕訥陛辭上驚問其故焯與文徵等皆坐誅焯家故鑄工
既貴猶稱余待詔兒為人長者未嘗譖毀人每進見微有所


寬釋居家尤恭謹望里門卽下故所往來必自名若未嘗貴
者乃爲文徵所誤至此

朱國楨明開國臣傳

龔簪字叔言其先汴人宋有侍御史猗者扈高宗南渡始家崑
之真義里簪其七世孫也洪武十一年以歲薦授岳州學正
所得俸錢惟贍二兄齋廚索然諸生有以通鑑贄者覽卒還
之曰已拜貺矣數年岳州陞爲府詣關候調與守偕入見上
問守一切民情物力守震懼莫能對上顧問簪簪條對甚悉
上喜拜兵科給事中後以言事忤旨謫戍五開衛不一年卒

王志堅張大復傳合纂

王履字安道篤志問學博通羣籍教授鄉里爲後進楷則能詩



文工繪事洪武十七年游華山作圖四十幅記四篇詩一百五十首窮攬太華之勝為世所稱又精醫藥從金華朱彥修游盡得其傳著傷寒三百九十七法辨標題原病式一卷百病鈞元二十卷醫韻統一百卷醫家宗之子伯承能世其業無子盡以其術傳壻沈仲實云

明史列朝詩集張大復傳合纂

王遜字謙伯崑山人洪武十八年進士為監察御史降上高縣丞戴罪殺賊尋以功復官遜明敏健刻憲度肅然雖家居不少縱或謂曰君嚴自治耶遜曰吾讀書求道已不自治安能治人每以直言貶切同列後得罪服毒死子復字從道宣德五年進士授行人司副遷南京御史耿直類其父人稱小御

史坐事戍遼陽病卒復子曰敏石門訓導

始蘇志叅縣志

孟忠字廷臣崑山人洪武初以賢良薦授武寧知縣革除後文皇帝思高帝舊臣欲召用堅辭不赴賜勅嘉之以壽終於家

列朝詩集

王英字俊伯宋朝請大夫葆之裔洪武中以貢授監察御史上察其可用命署都御史事大書敦厚王英四字揭之殿柱尋授刑部主事進郎中出為寧海知縣永樂初召入復為郎中陞陝西按察使丁母憂服除改山西秩滿仍命治陝已而得代行至泗州卒淑人閻氏義男保隨行簡其橐不滿一金弗克還柩乃火而歸骨焉英立朝謹畏每謂妻子曰我以身許

國勿以我死生為念時有建白輒毀其藁及長臬司以簡靜為治不事苛察居鄉尤率易嘗微服入郡城時禁庶民服靴門者縛英英笑曰我官人也取舟中冠帶示之得釋亦不怒又嘗行道旁有負齎者並道行擠英入水怡然攝衣起他日復遇於道其人棄所負却走英召而慰遣之邑令設盛饌邀英辭之而赴隣翁飯或問之曰隣翁貧治具不若令之易也孫廷綱字成憲以貢為教諭清謹有祖風姑蘇志王志堅傳合纂朱吉字季寧德潤子初喪母值元季兵亂奉父周旋患難張士誠據吳游士多苟從之惟吉不少降志自吳城徙家崑山避之洪武中以薦授戶科給事中時糧長稽違勘合皆坐死籍

沒吉疏言勘合雖違而稅糧已足乞減死又乞寬胡藍黨禁以安反側皆從之後以善書改中書舍人尋改侍書出為湖廣按察司僉事坐事繫獄永樂初赦復為中書舍人年八十一卒吉之學以聖賢為師謹言慎行處已待人表裏一致所著曰三畏齋稿子定安字士隆尤工古篆得周伯琦之傳嘗積其書草瘞之名篆塚中允吳均有篆塚記次泰安字士栗永樂三年鄉薦授內黃教諭其教學者以熟傳註敦行誼為先歷安仁安吉陽信三學致仕歸僦屋數椽授徒餬口布袍蔬食處之怡然年九十三卒次永安字士常亦善筆札皆清修篤學不墜其家聲云姑蘇志參王志堅傳

范從文字復之之柔六世孫父原良明初為潮州府推官客死
 藁葬從文方弱冠匍匐至潮求攢不得日夜號泣俄大雨頽
 其封湧骨出果有識焉乃以歸葬洪武中以國子生擢監察
 御史改戶部主事奏免株連盜倉罪百餘人俄為同官所陷
 謫役莊浪頃復追戍金齒徙廣南永樂初以薦起為金華訓
 導歷東安金鄉三學致仕歸年八十七卒所著小學章詒宗
 牒補遺復齋集若干卷

王志堅云從文傳郡邑志互異
 考墓誌唯方志甚確今從之

呂昭字克明崑山人嗜學敦行洪武辛未以薦授徐州訓導上
 疏言民事稱旨改浦城縣丞縣多荒地昭以俸市穀給無產
 者俾藝其地而不責其償自以粟少許種堂外有九穗者人

以為德政之徵永樂甲申陞沁州知州父老持金為贈皆謝
 却之至杭不能僱舟抵家始得償比赴沁道經徐州天寒尙
 未挾纊故所授經弟子共為買一毛裘僱一驢以往在沁六
 年清操愈勵子旦舉進士貽書戒之曰進士固美官然不能
 廉終非吾子也死亦不歆汝祀其廉介如此旦字寅伯永樂
 丙戌甫釋褐即奉命伐木湖湘又督開平糧芻皆稱職陞河
 南僉事坐事繫長蘆十年免歸宣德初起為建昌府推官歷
 兩考政聲益振正統乙未以母老乞歸環堵蕭然未嘗以貧
 窶為意及卒無以為殮故人魏尙書驥買棺葬之

姑蘇志
 參縣志

王明善字復初號樵玉性剛介隱居授徒教律嚴謹時兵火之

餘人鮮知學明善實爲之倡百里內外聞其風負笈而來從者幾千人一經訓厲咸有成立其弟子朱璣字廷儀自少力學尤精於易春秋築室學宮之側生徒雲集室隘不能容至設帷庭中以處之設教三十餘年弟子稱爲素菴先生永樂中又有舉人黃鐸有學行與進士張經俱不樂仕進教授里中多所成就云縣志

史謹字公敏少從倪瓚高啟游博學好古工詩畫甫冠從戍滇陽洪武末翰林學士王景薦其才授應天府推官左遷湘陰丞尋罷僑居金陵自號吳門野樵年七十餘卒有獨醉亭詩

集張大復傳

陸安字修平邑三畝民父德甫好結客以事連坐論死時國法方嚴卽當棄市安時年二十初婚卽別其婦抵京大書代父典刑四字於布袍伏闕哀請許之臨刑之日從容就刃觀者千人無不泣下德甫伏屍哭提骨東歸妻鍾氏抱骨哭盡哀亦自經死張大復傳參舊縣志

范廷珍字惟中父彥良洪武中以里中子不法事連坐廷珍率其弟廷珪詣官請代父死情詞懇切百折不却官爲感動得末減兄弟俱戍河間廷珍故善醫遂以醫濟河間人無論貴賤貧富悉爲診視病者輒起晚年學益該博喜吟咏字法歐陽年九十餘猶日作數十紙葉文莊嘗記其事縣志

龔詡字大章父譽洪武中爲給事中謫戍五開詡甫三歲從母

王依外家未幾譽死戍所勾伍之牒旁午賴宗人保持之

張大

復傳云賴宗人清惠公保持之按清惠公者龔理也理於正統元年始登第是時恐尙未生或是理之父賢然不可考矣

年十四白母詣闕候補得遼陽調守金川門燕兵逼金川谷

王棟開門降守者奔潰詡奮戈不中走郊外回顧宮中火起

乃大慟亡命變姓名王大章匿江陰常熟間然時竊竊聞追

討聲夜走任陽投馬陳二家二家故多藏書修朱家郭解之

義乃匿之大困中卽困中讀書几榻盡穿多所纂述間夜渡

婁省母禁稍解賣藥授徒更二十餘年人固知之無告者宣

德中詔寬軍伍始得歸時周文襄忱撫吳聞其賢具禮訪問

便宜爲條上二十事次第行之母卒詡已班白悲號毀瘠久

之忱欲處以師儒之任兩薦爲松江太倉學官不就曰詡老

兵仕無害恐負往日城門一慟耳因泣下忱歎息而去晚隱

虞浦無子獨與一老婢居破廬中有田三十畝種豆植麻歌

咏自得成化三年年八十八整衣端坐口誦大學首章而逝

有白氣起屋上門人私謚安節先生萬歷初詔錄遜國諸臣

撫臣張佳引疏請建祠學宮之西

王張二傳參列朝詩集縣志

范能字仲能少從毘陵謝應芳游精醫喜吟尤工書法永樂初

被徵賦詩上郡守願養母全其天年守憐而許之日以著述

爲事年八十餘卒著有淞南集同里孫俊字叔英家澱湖

之陽從范能游工詩不慕聲利晚年築草堂於磧溪之南日與里人陳宗信等觴詠其間所著有南溪草堂集

王志堅傳參舊縣志

劉璉字廷璉崑山人永樂十年進士任御史陞山東參政洪熙

初參贊宣府軍務宣德十年兼督邊儲陞戶部右侍郎尋轉左仍兼巡撫累降敕褒獎璉公勤廉謹人不敢干以私在邊

數年終始如一日後都御史李秉督邊儲悉依璉法景泰二年致仕卒於通州不能歸遂卽其地葬焉天順三年葉盛參

政山西奏璉在邊年久保障有功乞恩褒卹於是遣官諭祭

遷葬崑山

姑蘇志

虞祥字仲禎永樂辛卯舉人授金華訓導遷上虞教諭擢禮科

給事中陞掌科事慶壽寺僧覺貴構中官創造毘盧閣僭擬

非度祥劾奏毀之寘僧於法陞通政司參議正統八年進戶

部右侍郎尋改兵部巡視畿輔所至剷除貪酷存問疾苦民

賴以安卒於位賜祭葬祭酒李時勉銘其墓子震字啓東性

剛介父卒無遺貲僦屋以養母母卒居喪盡禮讀書工詩雖

老未嘗一日離書案所著有常春稿江湖小稿樗菴暇筆旅

寓雜鈔數十卷震子臣字元凱成化十四年進士授兵部車

駕主事遷職方郎中復歷武庫車駕在郎署垂二十年清慎

自持遇事執正不受私謁遷四川參議尋致仕歸橐蕭然惟

以文酒自娛所著有丙辰奏草述古錄竹西亭稿

王張二傳參獻徵錄

舊縣志

夏景字仲昭崑山人先冒外姓朱氏登第後復今姓景以經術進而書法特妙由庶吉士改中書舍人文廟嘗試其書第一特命書諸宮殿榜遂賜第宅免朝參眷顧極隆初景字作昶因召見上曰日豈可從旁宜加永上遂為更定故今字皆從之後遷考功主事正統中出知瑞州府入為太常少卿進正卿致仕景為政不事名譽而人安其平易居家孝友風流文雅有高人之致詩詞清麗尤工畫竹石擅名天下至於朝鮮日本諸國皆懸金購之兄曷字孟暘亦善書初為永寧縣丞謫戍隆慶景既被遇文皇間問其書所自以曷對即日命馳

驛入見試書稱旨授中書舍人

姑蘇志

王永和字以正

陳循墓碑姑蘇志俱作字用節

少至孝父病伏枕十八年侍湯

藥無少懈永樂中舉於鄉歷嚴州饒州訓導以蹇義薦為兵科給事中嘗劾都督王彧鎮薊州縱寇及錦衣馬順不法事持節冊韓世子妃糾中官蹇傲罪以勁直聞正統六年進都給事中八年擢工部右侍郎十四年從征至土木死之贈工部尚書官其子汝賢大理評事後謚襄敏明史次子汝敬天順己卯舉人汝霖正統戊辰進士歷官河南右布政使奉公卹民有父風縣志

盛頤字養蒙其先大梁人高祖德輝始居崑山之高墟頤三歲

而孤事母以孝聞及長講求濂洛之學工詩能書永樂十七年詔求遺賢守臣以頤應入見稱旨超拜江西左布政使至則清理逋賦決遣滯囚凡有施設必簡大僚之廉勤者畀之而已總其成剛柔緩急悉協機宜先是江西鄉試寄學宮多奸弊庚子當大比頤度城南做地刵建貢院嚴飭關防是科得人稱盛乙巳入覲陪祀南郊特加寵賚衆頗忌之因言者落職宣德初詣闕辨理授南京工部員外郎歷八年三使藩府皆有廉能譽後以疾還南京卒

張大復傳參縣志

張經字伯緒博學嗜古永樂甲辰登進士時進士多遣歸就學經既歸不樂仕宦授徒為生張和兄弟皆出其門嘗謂諸生

曰人生切不可有嗜好若輩他日居官一有嗜好則胥吏僕

隸惟是之窺矣年三十三卒子希賢亦以學行稱

王志明傳

張準崑山人永樂中知建安縣有惠利民懷思不忘

見明史員秉彝傳縣

志不載

陳皞字孟東少孤貧習法律算數之學永樂初芮翀知縣事擇知學者為吏皞衣青衣立堂下年特少因辟為從事諭令就學乃以間從林鍾說春秋偶桓說詩遂通五經之義兼能詩善書通政趙居任治水吳淞一見器之後應幕府書記從豐城伯平交趾以年勞授會稽知縣讞減寃囚杖殺逃軍之害民者先是會稽民獷悍不就徭役皞懲其尤黠者數十人申

明法令俗遂革改知淳安縣致仕歸常不自給性强記歷代史皆略上口詩宗少陵有安止齋稿若干卷從子助字賢佐少從鄭文康沈愚輩講學里中號十鐸助能為長短詩歌精書法曉古今篆隸又能寫喬柯竹石仿漢晉印章正統初以薦授桐廬縣丞歷知新淦金谿二縣有能聲自免歸卒

張大復傳

參王志堅傳

章賢字士希永樂十八年舉人授大理評事歷官漢陽知府性廉謹居官二十餘年終始一操既免不能歸留寓南京僅給饘粥病死衣不覆肘鄰人賣所遺敝器殮之歸葬馬鞍山北

張大復傳

吳凱字相虞父公式早亡遺腹生凱能力學養母里胥嘗召之役詣縣自陳有母不能遠離竊有志於學縣令芮翀異其言立遣就學後充貢京師中順天鄉試宣德中授刑部主事改行在雲南司再改禮部主客司以母老乞歸遂不復仕凱精敏有治劇才平生以禮自律言行不苟風儀嚴峻人望而畏之家居四十年非公事不至公府葉盛尤重之嘗曰鄉里作官前輩當法吳丈後輩當法孫蘊章

姑蘇志

及卒鄉人私謚貞

孝先生

縣志

蔣明字奎章少孤力學舉永樂二十一年鄉試授慈利教諭方嚴有體宣德初奏請元儒吳澄從祀文廟學者爭師尊之明

廉謹自持不屑阿附會臺使行縣傲慢無禮色辱明明遂棄官歸考訂今昔作崑山志注文公小學

張大復傳

衛靖字以嘉崑山人洪熙初以能書薦授中書舍人直文淵閣陞禮部主事預修宣廟實錄靖謹厚能詩所著有公餘清興

集姑蘇志


甘霖字用汝博學工文詞宣德乙卯貢入太學授延平府同知轉衢州在任廉平不苛衢大旱徒步虔禱雨大澍考滿遂致仕縱情山水文酒間卒年八十五霖性孝友初父伯清疾亟以孽子密屬霖善撫之霖游成均密家居偶出嬉戲遂失所在霖聞悲愴不自勝踪跡萬端歷五年將謁選入京祀其先

曰某不遇密不敢就職俄得之京民安士傑家為奴力請贖

歸友愛備至張大復傳

屈昉字季恒才情倜儻讀書不事章句嘗從軍崇明寫懷寄遠詩篇傳播為楊士奇所知楊問崑令羅永年季恒安在羅不能荅楊曰君尚不識屈某耶羅有慚色心識之還縣適詔舉經明行修之士遂以昉薦授南海縣丞十年不調乞致仕有

寓菴集張大復傳



蘇州府志卷五十八 終

蘇州府志卷五十九

人物十三 崑山縣

明

龔理字彥文正統元年進士授工部主事進郎中會河決張秋時已擢徐有貞督治又慎簡方岳大臣協治之廷推得理景帝曰是不要錢龔郎中乎遂超拜山東左布政使有貞之治理實贊成之有同官簞簞不飭理峻詞規之其人亦卒改節為善已而嬰末疾告歸卒理性方正毅然有為卒之日橐中蕭然惟先世遺集及所著最美集鄉人私謚曰清惠子紱字朝美成化七年鄉薦有文行為青縣教諭自免歸葉盛嘗言

生子當如龔朝美自可不愧彥文後云

王志堅傳
參縣志

張和字節之正統己未舉禮部廷試擬第一上偵其眇一目易置二甲第一遂謝病歸景泰庚午聘主江西鄉試明年授南京刑部主事乙亥召修宋元通鑑綱目天順初還南京歷員外郎郎中辛巳出為浙江提學副使儀範肅然待諸生有恩義甲申以病歸抵家而卒浙士數百人賻哭哀之如父和廉介端謹足跡不入權貴之門聞忠賢節義事喜躍如自己出不喜議人得失嘗曰人當於有過中求無過不當於無過中求有過讀書數行俱下為文立就既仕猶苦學所著有條菴

集

姑蘇志王志
堅傳合纂

張穆字敬之和弟文章與兄頡頏宣德乙卯舉於鄉不肯赴公車曰兄弟齊名何有先兄一第者及正統戊午和亦舉於鄉己未同登進士授工部主事歷刑部員外郎中天順改元擢山東副使兼理學政鋤強去貪一道肅清表伯夷閔子孔融狄仁傑慕訪孫復石介之後給以衣食在平修志命斥華歆進馬周東土服其風化成化初進浙江參政解官歸無以自給門人故吏為買田松江以老焉卒年七十三所著有勿齋集又邑人夏遂字存良亦己未進士授禮部主事以才幹聞早卒

黃雲狀
參縣志

沈愚字通理號倥侗生父方字孟舟清修好學積書數千卷皆

親點校愚博涉百氏以詩名吳下與劉溥諸人稱十才子其
 詩清美回熟尤長於古風有篋籟集二十卷吳飲集五卷善
 行草曉音律詩餘樂府傳播人口斂跡不出業醫授徒以終
 其身弟魯字誠學專攻古學為文奇麗閱博一時稱為作者
 制行修潔居家孝友所著有經制權略人倫師表坐道論老
 成集等書

姑蘇志參
 王志堅傳

沈訥字文敏愚弟正統七年進士授大理評事陞寺副景泰元
 年出為福建僉事督松溪銀冶正額外不求羨餘盜起慶元
 入松溪界訥以計擒之得不滋蔓五年鄭懷冒復亂訥在政
 和得報即集眾勦捕縛其渠帥尚書孫原貞上其功天順二

年遷副使歲餘卒年四十六樞還之日閩人悲號擗踊遮道
 不能行訥身不踰中人而天性明敏每聽獄兩喙爭譟訥一
 言折之無不得其情志尚高潔為文章必貴已出所著有免

園遺冊下里餘音 姑蘇志參
 王志堅傳

葉盛字與中崑山人正統十年進士授兵科給事中師覆土木
 諸將多遁還盛率同列請先正扈從失律者罪且選將練兵
 為復讐計郕王即位例有賞賚盛以君父蒙塵辭不許也先
 廵都城請罷內府軍匠備征操又請令有司儲糧料給戰士
 遣散卒取軍器於天津以張外援三日間章七八上多中機
 宜寇退進都給事中言勸懲之道在明賞罰敢戰如孫鏜死



事如謝澤韓青當賞其他守禦不嚴赴難不力者皆當罰大臣陳循等議召還鎮守居庸都御史羅通并留宣府都督楊洪掌京營盛言今日之事邊關爲急往者獨石馬營不棄駕何以陷土木紫荆白羊不破寇何以薄都城今紫荆倒馬諸關寇退幾及一月尙未設守禦宣府爲大同應援居庸切近京師守之尤不可非人洪等旣留必求如洪者代之然後可以副重寄而集大功帝是之尋命出安集陳州流民景泰元年還朝言流民雜五方其情不一雖幸成編戶而鬪爭讐殺時時有之宜專官綏撫又言畿輔旱蝗相仍請加寬卹帝多採納明年上弭災防患八事帝以兵革稍息頗事宴遊盛請

復午朝故事立報可當是時帝虛懷納諫凡六科聯署建請多盛與林聰爲首廷臣議事盛每先發言往復論難與議大臣或不悅曰彼豈少保耶因呼爲葉少保然物論皆推盛才擢右參政督餉宣府尋以李秉薦協贊都督僉事孫安軍務初安嘗領獨石馬營龍門衛所四城備禦英宗旣北狩安以四城遠在塞外勢孤奏棄之內徙至是廷議命安修復盛與闕草萊葺廬舍庀戰具招流移爲行旅置煖舖請帑金買牛千頭以賦屯卒立社學置義冢療疾扶傷兩歲間四城及赤城鷓鴣諸堡次第皆完安由是進副總兵而守備中官弓勝害安奏安疾宜代帝以問盛言安爲勝所持故病今諸將無

踰安者乃留安且遣醫視疾已又劾勝卒調之他鎮英宗復位盛遭父憂奔喪天順二年召爲右僉都御史巡撫兩廣乞終制不許瀧水猺鳳弟吉肆掠督諸將生擒之時兩廣盜蜂起所至破城殺將諸將怯不敢戰殺平民冒功民相率從賊盛與總兵官顏彪破賊砦七百餘所彪頗濫殺謗者遂以咎盛六年命吳楨撫廣西而盛專撫廣東憲宗立遷左僉都御史巡撫宣府請量減中鹽米價以勸商裕邊復舉官牛官田之法墾田四千餘頃以其餘積市戰馬千八百匹修堡七百餘所邊塞益寧成化三年秋入爲禮部右侍郎改吏部出振真定保定饑議清莊田分養民間種馬置倉涿州天津積粟

備荒皆切時計滿都魯諸部久駐河套兵部尙書白圭議以十萬衆大舉逐之沿河築城抵東勝徙民耕守帝壯其議勅盛往會督撫詳議盛知時無良將邊備久虛河套未可輕議乃會諸臣上疏言守爲長策如必決戰亦宜堅壁清野伺其情歸擊之令一大創庶可遏再來又或乘彼入掠遣精卒進搗其巢令彼反顧內外夾擊足以有功然必守固而後戰可議也帝善其言而圭主復套師出竟無功人以是服盛之先見八年轉左侍郎十年卒年五十五諡文莊盛清修積學尙名檢薄嗜好家居出入常徒步生平慕范仲淹堂寢皆設其像志在君民不爲身計有古大臣風

明史

鄭文康字時父其先汴人南宋始家於崑世為帶下醫父壬字
 有林天性孝友沉毅簡重博學強記精醫術人稱雙松先生
 文康長身偉軀目光耿耿射人尚友古人氣蓋一世登正統
 戊辰進士見者咸以公輔期之觀政大理寺聞父病請歸養
 未抵家而父亡母亦尋卒悲悼數年加苦宿疾遂不復仕家
 居枕藉經史雖病不少休尤善經生義出其門者多取科第
 好談忠孝節義表善與賢闡幽弔古若嗜欲然為詩文頃刻
 數千百言稿成輒為人持去其存者有平橋集十八卷多記
 載時事有益勸懲而文尤簡質有法度

王張二傳列朝詩集
縣志合纂 王志堅

日文康嘗自言少時有友十人日以倡和講學游從為事當
時有忌者呼為十鐸方言鐸猶癡也至為十鐸詩其後皆有

官或為聞人十人者沈愚及弟魯自有傳陳助見陳偉傳周
叙字叔倫以貢官主簿張謙字克讓以貢官知縣夏祐字存
賢以薦官鑄印大使沈祥同登進士官參議黃琚呂穆皆隱
居不仕琚鐸之子也又有周號者文康妹婿工篆隸及畫梅
凡文康探奇弔古
之事皆為佐之

孫瓊字蘊章其先長洲陸氏以父後崑山孫道庠遂冒孫姓家
 崑山瓊舉正統戊辰進士授刑部主事歷員外郎郎中凡十
 五年公廉平恕如一日故事每歲終以通問罪犯類報尚書
 選諸郎明慎者重加審錄瓊被選及引對內廷無一人稱寃
 者江西安福彭氏泰和龍氏蕭氏為邑人所訐奏詞連數十
 百人尚書屬瓊往治之悉得其實寘於法監生王喜為盜所
 攀久繫不決一鞠得其實立出之每出署被訛者羅拜馬首

常數十人曰是能生吾者也天順中錦衣指揮門達恃寵黷
 貨用苛刻羅織人罪既抵部郎官莫敢異惟瓊多所平反太
 監牛玉假子犯法囑瓊不少貸由是積怨權貴竟以同官
 得罪連坐謫戍遼左成化初復官月餘即乞致仕年僅四十
 家居篤於禮度終日端坐未嘗傾側所居朴陋人不能堪而
 處之裕如喪祭極其哀感每旦必衣冠拜先祠非疾不廢卒
 年六十八所著有鹿城稿子裕乙未進士官終知州

姑蘇志
參王志

堅
傳

梁棟崑山人父孟鏞洪武中為館陶主簿指眾食貧乃贅其少
 子鏞民家母意甚憐嚙鏞背識之灑淚而別孟鏞既卒棟思

鏞不置白母詣館陶已失主家所在嗚咽奔還爾後隨所至
 輒求之垂三十年後以事寓華亭東禪寺會大雨有僧袒而
 決渠露癢痕棟見心動就與語即鏞也載與歸相友愛終其
 身子昱字文輝性持重初婚三日喪父茹淡寢苦竟禪除不
 入寢舍正統十二年領鄉薦授平定州知州省刑緩賦州民
 德之卒於官歸櫬之日哭聲載道孟羹瓦飯相望子統字尚
 素成化七年鄉貢通判漳州陞泉州同知愷悌清勤兩平巨
 寇民為立石頌德

張大
復傳

支琮字敬將崑山諸生家貧奉母不能具純綿冬寒母不能寐
 輒取己所服青袍覆母疊跽而坐有郡倅慕其為人凌晨往

候之母睡方熟恐驚動不敢啓竟以短衣出見倅知其故嘆息而去巡撫周忱賙之粟帛正統間選為南京留守衛經歷

張大復傳

朱旻字希仁璲從子年十九登正統甲子鄉薦會試中乙榜歷諸暨浮梁訓導遷昌平教諭天順未嘗上疏言臣聞圍獵近

郊其徒弗戒驚動陵寢祖宗在天之靈其能安乎上聞即為

罷獵後遷臨川石首教諭典試山東河南陝西得人稱盛縣志

夏璣字德乾景泰甲戌進士授應城知縣母喪服闋補新淦商稅引錢積至千兩舊例皆以充公用璣悉籍以備賑富人周

某殺人璣寘之獄周賂當道欲出之璣不可無何調大庾璣

去富人乃得出新淦民為立生祠擢為御史出清軍浙江籍

無漏者而民不擾以疾告歸杜門簡出日惟養親為悅璣性

好飲在應城嘗醉後撻人母戒之已而母亡遂終身不飲家

居四十年未嘗輕入公府兄弟三人皆先卒遺孤纍纍同居

共爨婚嫁之費皆出於璣自奉簡儉食無重味出無輿馬清

修苦節終始如一曰

王志堅傳

朱萱字樹之天順八年進士授大理評事萱能詩歌筆翰皆有

師法而泊然自守年輩有第望劣於萱而位出其右者眾或

不平萱曰出處固有命耳略無愠色以疾乞歸卒葉盛為誌

其墓深惜其不寃用焉

王志堅傳

陸欽字鼎儀崑山人少與太倉張泰陸容齊名號婁東三鳳舉
 天順八年會試第一成化二年殿試第二授編修預修英宗
 實錄遷修撰侍皇太子講讀欽進退閑雅敷奏明鬯滿九載
 擢諭德孝宗立進太常少卿兼侍讀充經筵日講官得疾乞
 歸卒年五十詔賜祭葬官其子爰中書舍人欽在詞林以端
 謹清峭稱其為文簡勁有法詩亦如之所著有春雨堂稿春
 秋抄略爰字子引負才喜聲詩作字端勁屢使藩府饋遺無
 所受忤劉瑾致仕後起原官遷禮部主事明史姑蘇志王
 志堅傳合纂
 王庭字元直少學於葉文莊文莊甚器之領鄉薦授鄆州學正
 遷國子學錄再遷潘王府右長史卒庭孝友廉慎在鄆時就

民田耕以自給諸生束修無所取律身教人動以古道在王
 府尤得輔導之正嘗考試江西御史欲試諸考官庭獨不就
 試御史卒用以主試曰是不苟人也庭生平自負剛直百撓
 不回其學貴踐履不事辭章常曰徐穉管寧不能詩而世仰
 其名時以為名言姑蘇
 志

張潮字思信嚴毅雅飭自幼嗜學尤精於書隱居授徒未嘗輕
 出邑令歲舉鄉飲一至城郭見者知敬同時有石璞字元素
 蕭散不羈翛然塵外尤善吟詠所著多關民風禪世教者晚
 年喜畫山水思致非俗工可及邵魯生字師聖力學自樹資
 舌耕以養母晚築春水草堂吟哦其中與潮璞同居里閭鄉

稱三老又有張翼字汝敬戚軒字宗軾皆工詩業文教授鄉里
里有隱者之風並成化時人也

王志堅傳

高敞字德廣成化壬辰進士授禮部主事歷員外郎郎中再使
遼府行冊封禮還賞賚大同將士咸稱職陞順天府丞弘治
初畿內大饑請發內帑十萬賑之進應天府尹或勸以綜覈
者曰吾於事務理其緒急而張之雅非吾性人服其有體亡
何病卒幾不能殮御史王倬部郎王秩相與賻其喪上聞深
惜之賜祭葬

張大復傳

張汝舟字濟民成化甲午舉人授南昌府同知寧王宸濠驕橫
凡仕於其地者指為畏途汝舟至以清嚴著宸濠始欲致之

汝舟修溫太真祠以見志藩府嬖人之兄為盜就縛嬖人中
夜泣宸濠為之請汝舟唯唯卒寘之法宸濠嘗以失火給汝
舟往救將害之汝舟抵府門曰正殿災當親赴若延燒傍舍
一隸人事耳遂不入武寧知縣馮某以貪殘為民所告當道
與馮有連使人來屬汝舟不從劇賊徐九齡嘯聚建昌憲司
檄汝舟往討接戰被創益設方略卒殲之遷思南知府更以
簡靜為治清浪都督趙某貪暴杜殺指揮李某李子訴於朝
趙素結交權要主者畏之以事屬汝舟汝舟無所撓卒致其
罪死於獄任滿當遷一夕夢其母悴甚且廢明急請致仕歸
果如所夢云家居田僅百畝而待族人鄉黨皆有恩誼年七

十二卒弟汝粟癸卯舉人知定海縣子擢秀嘉靖辛卯舉人

知廣平縣

王志
堅傳

吳瑞字德徵成化乙未進士授南京吏部主事改工部出理徐

州洪邗商人餽金歷郎中督理河道鑿高郵甓社湖左腹河

四十餘里以免覆溺之患復上疏請蠲所鑿田賦額以疾乞

歸絕意仕進凡二十年瑞邃於易尤工古文詞所著有西溪

集宦游居閒二稿子蘭弘治己未進士官御史

黃雲誌
參縣志

秦獻字廷贄成化乙未進士授刑部主事陞員外郎郎中御史

彭程因言事繫獄獻首白其無罪弘治庚戌兩廣巡撫秦紘

劾安遠侯柳景鎮守不法事上命獻往勘之獻至悉發景奸

景懼誣以與紘有私上命廷臣會問午門外卒抵景法紘尋

起為尙書一時公論倚以為重陞貴州副使以公使省母遂

不樂仕放情邱壑間卒年五十四

王志
堅傳

吳愈字惟謙凱子成化乙未進士授南京刑部主事歷員外郎

中初凱起家刑曹每為愈言折獄之道愈在部繙閱舊牘遂

精法律一時奏讞咸倚以決出知叙州府慶符盜劫縣治令

捕得二十七人已誣服愈疑之乃詣縣辨審釋二十五人未

幾果獲真盜士官安鰲以馬湖叛眾議用兵愈策曰鰲無遠

謀然其甲兵精利未易敵也彼中無水當重圍以困之議未

決而鰲忽棄城走眾慮其糾諸夷為亂愈曰彼以郡守將兵

接戰勝負未可知既離巢穴一窮寇耳諸夷皆其仇又何能為因遣人襲之不血刃而獲自是馬湖改置流官後其黨復劫府印為亂愈親抵其巢諭之遂獻印解散在叙九年遷河南參政致仕歸卒年八十四

文徵明誌參
王志堅傳

管琪字儒珍崑山人器宇寬厚律身清謹成化戊戌進士授中書舍人歷官湖廣左布政使羨餘一無所取會入覲不事干謁眾頗不悅有勸其少通關節者琪以夤緣求用為恥作書却之竟以年老致仕

王志堅傳

朱棣字良用璫孫成化十七年進士授蕭山知縣均徭息訟扶善鋤強縣有湘湖久為豪右所占棣浚之以時蓄洩湖田大

稔擢南京御史與同官劾文選郎貢欽招權納賄罷之又因災異上疏切指時政秩滿便道省母卒於家

張大復傳

盛洪字思禹頤會孫成化甲辰進士授刑部主事歷員外郎中三按大獄事皆涉中貴或為難之洪悉論如法然用心平恕每語人曰刑官當於死中求生不當於生中求死擢廣東海道副使先是通番買港之徒騷擾驛傳至是屏絕市舶中官利通私貨夜以黃金餽之洪拒不納禁益嚴由是怨謗沸騰終不為動又上疏論通番奸弊及保安事宜劉瑾欲中傷之無所得乃以添設例裁缺免歸尋以海道舊事檄召赴廣已擢山東按察使洪已卒於道矣洪歷任二十餘年不殖厚產

所居蕭然人以爲難

王志堅傳

王秩字循伯成化丁未進士授永康知縣入爲南京兵部主事遷刑部員外郎轉廣東僉事被檄往勦廣西叛蠻進參議事平陞江西副使備兵南贛劇盜張士錦竊據名號秩生擒以歸諸盜相繼來降遷本省按察使桃源盜起副使周憲與戰陷陣死秩督兵進討立斬害憲者搗其巢寧庶人有異志憚秩嘗邀秩幼子入抱置膝上許以郡主妻之秩謝不敢當歸謂家人曰王志滿氣揚必且爲亂不出十年矣尋擢雲南布政使以侍養歸暴疾卒

王志堅傳

馮琨字君美崑山人父鈇字仲舉少孤力學每時祭嗚咽不勝

悲感閭里天順壬午鄉薦授東安教諭嘗校文河南江西皆稱得士琨舉成化丙午鄉試任永康教諭遷薊州知州勲戚貴璫奪民牧馬地爲莊園琨按籍覈之盡還之民勲貴怒誣奏琨逮下詔獄琨列主名幾何影占幾何爲孝宗別言之上咨嗟良久卽令復職武宗卽位逆瑾用事再收錦衣獄杖八十絕而復甦薊民挈榼餽餉不絕適有僧言於瑾曰馮知州惟飲薊州一杯水耳瑾愕然釋還薊州遷杭州同知再轉兩浙運同擢登州知府未二載棄官歸年八十餘卒子夢龍字翔甫以歲薦選應天府訓導遷潁上教諭吉州學正致仕老屋蕭然藜藿不糝巡按甘士价縣令聶雲翰歎其清絕

張大復傳

徐協祥崑山學生家居以孝行稱忽生並蒂瓜人以爲孝感所致弘治初知縣楊子器上聞詔旌其閭縣志

張安甫字汝勉和兄子弘治庚戌進士授祁州知州治尙清簡嘗鈞摘盜魁民賴以安母憂歸服除遂上疏乞休詔加四品服致仕時年未五十也先業在橫塘鑿方池作亭其上因自號天方好登覽吳越名勝無不游游輒有題詠視聲利寵辱舉不足以役其心少嬰脾疾未艾卽絕欲茹淡年八十四呼子孫謂曰吾其歸乎又二日端坐而逝王志堅傳

顧潛字孔昭鼎臣兄子弘治丙辰進士選庶吉士改御史奉勅往山東河南印信馬匹疏言馬政耗弊多由折色子粒俵買等項互累軍民乞復洪武永樂舊制庶民力可寬軍政肅清上勅所司罷行以疾在告輯唐虞以來事可爲法者附以論斷名稽古治要上之上嘉諭留覽畿輔災疏論時政八事皆見采納光祿少卿祝祥以附外戚進太常卿崔志端以道流累遷禮部尙書皆論罷之出督京畿學政以順德永平諸郡士鮮知學擇其秀穎者令至京師從明師受業士風丕變正德初劉瑾用事吏部尙書劉宇瑾私人也其子爲畿輔令謁潛潛不爲禮銜之乃出潛爲馬湖知府旋以格例罷其官潛生平以禮自持燕居如對賓客嘗著慎獨箴以志警家居事

親又十二年於舍南鑿池疊山為展桂堂娛之所著有靜觀

堂稿崑山志等書

王張二傳合纂

周倫字伯明弘治己未進士授新安知縣歲旱飛蝗蔽天倫虔禱三日大雨蝗死明年大水疏請振貸長堤潰以粟募民築堤堤成民亦得食拜御史巡視居庸龍泉等關正德初奉勅勘太監李興擅伐禁林山木奏入上嘉其直聞父病請急歸而父已卒劉瑾用事以養疾違限勒致仕又以曾薦都御史雍泰及論西庫布花積弊罰米三百石傾其家瑾誅復官疏請錄用謝遷劉大夏許讚等劾大學士焦芳總兵張洪等上皆納之巡按山西奏築太原南關新城及武寧關土堡塚口

濠塹久之陞南京大理丞進少卿嘉靖初遷僉都御史提督操江擢兵工二部侍郎拜南京刑部尙書旋改北部侍經筵時輔臣桂萼被論去詔逮其私人李夢鶴等下刑部張聰請解於倫倫不可無何聰召還仍出倫於南部三年謝政歸又

十年卒年八十贈太子少保諡康僖

王張二傳合纂

龔震字敬修領弘治乙卯鄉薦通判漳州時王守仁平汀漳盧溪諸賊震領調兵食深入先登守仁將薦之會震有條議忤御史幾落職尋調守武岡州武岡王淫泐縱諸健奴不法府第通州南門屠沽負販數受凌奪震一夕發卒百餘塞南門而穿一便門通往來諸奴震懼王亦不敢問亡何疾卒

張大復傳

蘇州府志 卷五十九 人物十三
顧鼎臣字九和崑山人弘治十八年進士第一授修撰正德初再遷左諭德嘉靖初直經筵進講范浚心箴敷陳剴切帝悅乃自爲註釋而鼎臣特受眷累官詹事給事中劉世揚李仁劾鼎臣汙佞帝下世揚等獄以鼎臣救得薄譴拜禮部右侍郎帝好長生術內殿設齋醮鼎臣進步虛詞七章且列上壇中應行事帝優詔褒荅悉從之詞臣以青詞結主知由鼎臣倡也改吏部左侍郎掌詹事府請令曾子後授五經博士比三氏子孫從之大同軍變張孚敬主用兵鼎臣言不可帝嘉納進禮部尙書仍掌府事京師淫雨四方多水災鼎臣請振饑弭盜報可十七年八月以本官兼文淵閣大學士入參機

務尋加少保太子太傅進武英殿初李時爲首輔夏言次之鼎臣又次之時卒言當國專甚鼎臣素柔媚不能有爲充位而已帝將南巡立皇太子命言扈行鼎臣輔太子監國御史蕭祥曜劾吏部侍郎張潮受鼎臣屬調刑部主事陸崑爲吏部潮言兵部主事馬承學恃鼎臣有聯白詭必得銓曹臣故抑承學而用崑帝下承學詔獄鼎臣不問十九年十月卒官年六十八贈太保謚文康鼎臣官侍從時憫東南賦役失均屢陳其弊帝爲飭撫按巡撫歐陽鐸釐定之崑山無城言於當事爲築城後倭亂起崑山獲全鄉人立祠祀焉

明史

魏校字子才崑山人其先本李姓居蘇州葑門之莊渠因自號

莊渠弘治十八年成進士歷南京刑部郎中守備太監劉瑯
藉劉瑾勢張甚或自判狀送法司莫敢抗者校直行己意無
所徇改兵部郎中移疾歸嘉靖初起爲廣東提學副使丁憂
服闋補江西兵備副使累遷國子祭酒太常卿尋致仕校私
淑胡居仁主敬之學而貫通諸儒之說擇執尤精嘗與余祐
論性畧曰天地者陰陽五行之本體也故理無不具人物之
性皆出於天地然而人得其全物得其偏又曰古聖賢論性
有二其一性與情對言此是性之本義直指此理而言其一
性與習對言但取生字爲義非性之所以得名蓋曰天所生
爲性人所爲曰習耳先儒因性相近一語遂謂性兼氣質而

言不知人性上下不可添一物纔著氣質便不得謂之性矣
荀子論性惡揚子論性善惡混韓子論性有三品衆言淆亂
必折之聖若謂夫子性相近一言正論性之所以得名則前
後說皆不謬於聖人而孟子道性善反爲一偏之論矣孟子
見之分明故言之直捷但未言性爲何物故荀揚韓諸儒得
以其說亂之伊川一言以斷之曰性卽理也則諸說皆不攻
自破矣所著有大學指歸六書精蘊卒諡恭簡唐順之王應
電王敬臣皆其弟子也

明史

周廣字充之崑山人弘治十八年進士歷知莆田吉水二縣正
德中以治最徵授御史疏陳四事略言三代以前未有佛法

况刺麻尤釋教所不齒耳貫銅環身衣赭服殘破禮法律爲淫邪宜投四裔以禦魍魅奈何令近君側爲羣盜與兵口實哉昔禹戒舜曰母若丹朱傲惟慢遊是好周公戒成王曰母若商王紂之迷亂酗於酒德今之伶人助慢遊迷亂者也唐莊宗與伶官戲狎一夫夜呼倉皇出走臣謂宜遣逐樂工不復籍之禁內乃所以放鄭聲也陛下承祖宗統緒而羣小獻媚熒惑致三宮鎖怨蘭殿無徵雖陛下春秋鼎盛獨不思萬世計乎中人稍有資產猶畜妾媵以圖繼續未有專養螟蛉不顧祖宗繼嗣者也義子錢寧本宦豎蒼頭濫寵已極乃復攘攸貨賄輕蔑王章甚至投刺於人自稱皇庶子僭踰之罪

所不忍言陛下何不慎選宗室之賢者置諸左右以待皇嗣之生諸義兒養子俱奪其名爵乃所以遠佞人也近兩京言官論大臣禦寇不職者陛下率優容卽武將失律亦赦不誅故兵氣不揚成功無日川原白骨積如邱山夫出師十萬日費千金今海內困憊已骨見而肉消矣諸統兵大臣如陳金陸完輩可任其優游玩寇不加切責哉請定期責令成功以贖前罪寧見疏大怒留之不下傳旨謫廣東懷遠驛丞主事曹琥救之亦被謫寧怒不已使人遮道刺廣廣知之易姓名變服潛行四百餘里乃免武定侯郭勛鎮廣東承寧風旨以白金試廣廣拒不受伺廣謁御史攝致軍門箠擊幾死御史

救之始解越二年遷建昌知縣有惠政寧矯旨再謫竹寨驛
 丞世宗卽位復故官歷江西副使提督學校嘉靖二年舉治
 行卓異擢福建按察使鎮守中官以百金餽廣貯之庫將劾
 之中官懼謝罪自是不敢撓六年以右僉都御史巡撫江西
 墨吏望風去將限豪右田不果明年拜南京刑部右侍郎居
 二年暴疾卒嘉靖末贈右都御史廣初以鄉舉入太學師章
 懋在里閭與魏校友善平生嚴冷無笑容居官公彊弗受請
 託士類莫不憚之

明史

黃雲字應龍家貧好學嘗就藏書家借錄輒能記憶凡刑名錢
 穀水利筭數軍旅儀制無不究心期為有用之學弘治中以

貢授瑞州府訓導嘗廷謁監司恥之輒欲解組去時邵寶為
 提學劉璣為郡守待以殊禮屢慰留之丁外艱歸遂絕意仕
 進雲為文得眉山遺意一時碑版之作以出其手為重然非
 其好終不與歲飢見親族孤嫠時復收養雖屢空弗恤也性
 方嚴不能作軟美態年七十餘卒所著有丹巖集

王志堅傳

方鵬字時舉幼岐嶷能記憶前生事正德戊辰與弟鳳同登進
 士授南京禮部主事歷刑部員外吏部郎中時大禮議興張
 璉桂萼皆在南部謂鵬曰今上卽位與宋英宗不同豈可援
 為口實鵬曰英宗為濮安懿王少子仁宗親取而立之今興
 獻帝止上一子與宋事遼絕繼統不繼嗣萬世不易正論也

因作書一篇以明之張桂喜甚未幾陞浙江參議遷山西提學副使已而張桂議行改鵬右春坊右庶子充經筵講官主順天鄉試遷南京太常寺少卿移疾歸家居十餘年足跡不入城市詩文典雅不尙雕琢所著有矯亭存稿崑山志等書

舊府縣志合纂

方鳳字時鳴初受學於兄鵬同登進士授行人擢南京御史母喪歸服除改北京出按真定以疾歸病愈補故官尋復改南凡爲御史歷南北四任嘗疏救胡世寧薦王守仁楊一清呂柟魏校及論吳中水利事皆天下大計嘉靖初張桂以議禮驟貴鳳力言其非以兄附張桂議因并劾之復自劾以謝兄

出爲廣東提學僉事旋自免去鳳與鵬素友愛及鳳罷鵬亦移疾歸同居新瀆里鵬善病多下帷靜坐鳳性逸宕多管絃之樂山林觴咏未嘗不怡怡如也年七十七卒

王志堅傳參張大復傳

柴奇字德美正德辛未與弟泰同登進士奇觀政吏部上書言東南水利先以白茆爲急次疏七鴉葺五堰且請以没入逆瑾之資給濟工費尙書楊一清上其議特命工部尙書李充嗣董其事績用告成是歲授吏科給事中奉詔監軍山東討流賊所核功罪皆當明年賊陷曲阜闕里禮籍樂器皆焚蕩奇奏遷曲阜城以護聖廟九月凱旋賜金織鷲袍加俸二級內艱服除補元官陞南京光祿少卿嘉靖己丑遷應天府丞

旋進府尹清勘官占地還之民積科試羨餘以拓貢院會南太廟災引咎乞休遂歸家居十餘年卒年七十三

王志堅傳

周震字世亨正德辛未進士授鄱陽知縣與勦姚源賊有功擢

御史疏論八事皆切時政清軍福建擒斬煽亂黠卒劾鎮守

中官侵牟鹽利商民大悅出為浙江僉事遷廣東參議罷歸

橐中蕭然有半塘稿南巡錄

縣志

周鳳鳴字于岐倫子正德甲戌進士授刑部主事初任監獄卽

令吏卒滌桮械潔圜室時給飲食手錄為監獄事宜後悉踵

行之歷員外郎中奉勅勘宸濠逆黨無枉縱者鳳鳴在刑曹

久明練法律諸司重獄悉取決焉尙書李承勳知其才以廣

東司所轄錦衣旗校狡橫難制命攝其事數日理積案殆盡

承勳改兵部卽薦鳳鳴為職方郎中籌邊擇將皆手自記注

人莫敢干以私嘗繪九邊圖以獻欲上知邊隅要害諸所建

白承勳必咨鳳鳴一歲中上百餘疏皆出其手擢大理寺丞

張孚敬欲陷夏言假薛侃疏坐以主使諸大臣莫敢異同鳳

鳴獨論言無罪御史馮恩以劾孚敬汪鉉下獄鳳鳴擬赦條

以為之地遂落職歸家居十八年薦者六十疏竟不起事父

倫及繼母至孝生平饒有心計廣廈數十間一經握筭尺椽

片瓦無所漏鄉人以事就謀如其言輒得羸卒年六十二所

著有後樂堂集西曹弼教錄職方奏議

王志堅傳

顧濟字舟卿崑山人正德十二年進士授行人擢刑科給事中武宗自南都還臥病豹房惟江彬等侍濟言陛下孤寄於外兩宮隔絕骨肉日疎所恃以爲安者果何人哉漢高帝臥病數日樊噲排闥警以趙高之事今羣臣中豈無噲憂者願陛下慎擇廷臣更番入直起居動息咸使與聞一切淫巧戲劇傷生敗德之事悉行屏絕則保養有道聖躬自安不報再踰月而帝崩世宗卽位之月濟上疏曰陛下踐阼除弊納諫臣民踴躍思見德化之成然立法非難守法爲難聽諫非難樂諫爲難今新政所釐多不便於奸豪權倖臣恐盤據旣深玩縱未已非依怙宮闈必請託左右持法不固則此輩將叢聚

而壞之此守法之難也唐太宗貞觀初每導羣臣使言及至晚年諫者乃多忤旨陛下首闢言路臣工靡不因事納忠高遠者似涉於迂濶切直者或過於犯顏若怒其犯顏其言必不入視爲迂濶則計必不行此樂諫之難也尋復言內臣張雄張銳等誑誤先帝業已逮治又獲寬解願斷以大義俾無所售奸帝頗嘉納旣又劾司禮蕭敬黨庇銳等而三法司會訊依違無大臣節不聽帝欲加與獻帝皇號濟言不可尋請侍養歸越數年卒

明史 舊府志作太倉人按顧炎武顧氏譜系考濟父鑑於嘉靖三年徙居崑山其

子孫皆爲崑山人故從明史採入

張羽字子儀幼孤家貧甚刻志向學讀書至丙夜不休母王篝

燈緝績以助之勤苦萬狀登正德十六年進士授工部主事
 奉使權關以寬簡為商人所戴客過無所饋遺大禮議起偕
 廷臣伏闕諫廷杖幾死改南京刑部郎中會前所忤過客在
 要路見中罷歸闢一圃日遊憇其中客至相與嘯詠觴酌中
 歲以哭母喪明然好客不衰林居四十年卒有集若干卷

王堅傳

王同祖字繩武曰敏孫少孤善病常匿帷中看司馬通鑑疾起
 悉了其義弱冠舉正德辛巳進士選庶吉士授編修同祖既
 積學讀書中秘益事宏博六經子史外陰陽律歷山經地志
 靡不記覽為文操筆立就大禮議起張孚敬驟貴一時諸臣

死徙斥逐同祖亦在遣中孚敬卒始用薦起為春坊校書尋
 進南京國子司業上疏請教世胄又請以薛瑄從祀孔廟庚
 子九廟災上言春秋哭災漢氏變服今詣陵題主宜比日中
 反虞之義不得吉服從事又言宗廟為石室藏主謂之宗祏
 公羊高曰主藏廟室西壁中以備火災宜鑿石為埴藏主其
 中以應古禮不報以言事忤旨落職通籍三十年立朝僅五
 歲未究其用人共惜之所著有五龍山人集東南水利書

張復傳參縣志

張寰字允清安甫子正德辛巳進士授濟寧知州調濮州東郡
 有大賊詔書名捕不得寰陰誘其豪具得囊橐遂捕斬之丁

內艱服除補開州陞刑部員外郎乞養歸父喪服除授通政
 司參議尋致仕歸惟以圖史自娛好遊名山初嘗從父觀雁
 蕩登天目後益縱意渡浙江抵武夷至匡廬還觀石鍾小孤
 采石九華黃山足跡幾遍東南又與尚書劉麟及各士吳琬
 陸崑輩為詩社歲春秋至茗上性夷曠多愛人望之蕭然有
 神仙之氣

歸有光撰墓表

徐申字周翰崑山人嘉靖初由鄉舉除蘄水知縣

縣志邑有迴風磯最險其

上一港通圻湖達大江申按前人故蹟以竹籠箐石改知上

塞湖以上實港俾湖水不江江水不湖民以永利
 饒徵授刑部主事昭聖太后弟張延齡之繫獄也申奏記尙
 書聶賢唐龍言太后春秋高延齡旦暮戮何以慰太后心宜

援議貴議親例請於帝賢等深然之獄久不決始延齡下獄
 提牢主事沈椿不令入獄置別所繼者益寬假之脫桎梏通
 家人出入會大猾劉東山亦繫獄上告延齡有不軌謀憾前
 主事羅虞臣笞已因訐及椿等帝震怒命執先後提牢主事
 三十七人付詔獄撈申與焉獄具當輸贖還職帝命杖之
 廷盡謫外任

縣志謫潮州推官

申既謫不赴歸與同里魏校方鳳輩

優游歡咏為樂久之卒

明史

顧夢圭字武祥御史潛子嘉靖癸未進士授刑部主事改南京
 吏部遷郎中應詔陳言論六事尤論中官鎮守之害得旨撤
 還擢廣東參議上疏乞罷採珠之役不報都御史陶諧議勦

山西猺空其地填以新民夢圭言猺不宜盡殺且新民畏其吞嚙而土兵厭猺山之荒落必不可居後卒如其言丁父憂服除擢山東副使改河南提學副使遷福建參政平連江壽寧松溪諸寇擢按察使陞江西右布政使致仕歸夢圭為人敦重所至闔戶讀書自奉如寒素久滯外省非其所樂嘗語所親曰北河權船者邪許之聲日腰彎折此今人以喻兩司官也所著有北海齊梁武平還山諸藁

歸有光誌 張大復人物傳夢圭孫天峻字升伯萬歷壬辰廷試第三授編修歷官左諭德為人敏秀通理初與王肯堂為沉博絕麗之文歸里後積書萬餘卷朱黃爛然識解超凡按天峻在當時為崑黨之首險詖無行被劾去官人物傳曲為回護不足信也以其尚有文學附見於此

顧夢川字禹祥夢圭弟性磊落好讀書父潛愛其該達悉以所藏書相與品叙甲乙羅列於堂夢川擁之而坐常取大白置兩楹間客至則沃之相與揚摧古今兼訂訛謬焚膏繼晷未嘗少倦晚歲貢入太學益復棲心元理寄興淡漠既歿門人私謚淳靖先生子允聘允烈終身不異財以孝友稱

張大復傳

晉憲字其章父鵬為宣平教諭憲八歲父授以尚書左傳及馬班諸史濂洛關閩之說能盡通之嘉靖癸未成進士授工部主事時張璠在政府命二子從憲受尚書絕不與暱權關荆南廉謹自守會疾在告三年補虞衡司主事營建慈寧宮謹物料絕干請政府不悅適兵部失火延燒工部署論者詞連

憲謫嘉興通判遷台州白免歸年八十二卒子驥精軒岐之學作傷寒辯論數十篇學者稱櫟菴先生

張大復傳

朱觀字顒伯萱從子嘉靖癸未進士授吉安府推官強毅明敏郡有殺人而莫得其主名者獄久不決觀禱於神夢一人體無完膚觀恍然曰周身刑憲其周憲乎遲明訊之殺人者果其妻之私人周憲也上官竒之類此者凡八事遂得旌異擢御史請放鷹犬清光祿積弊尋以言事忤旨廷杖二十既而巡按陝西黜貪墨吏若干人奏築花馬池至橫城堡邊墻一百六十餘里西陲賴之歷官河南布政使

王志堅傳

沈大楠字景明嘉靖癸未進士除東明知縣縣介三省為逋逃

藪大楠布法令明教化葺學宮表冉子墓清豪強隱匿陞南京刑部主事調吏部出為延平知府以羅從彥李侗從祀孔廟黜澹灘多厲石破舟溺人募役鑿之民利涉焉以才調福州府出繫囚省郵傳罷通海市大豪無所牟利觸權貴調官再補惠州府棄官歸子紹慶字子善舉嘉靖癸卯順天鄉試第一庚戌成進士授鄱陽知縣釐夙滯鋤豪猾罷衙前支應丁艱服闋補光山縣均徭平賦除虛糧數千石省進葛之數裁走遞之馬修邑志建義廩奏最陞儀制司主事進員外郎督學雲南以母老乞養歸卒孫應明字鳴熙遷居郡城萬歷已未進士累官兵部郎中降東昌府推官

舊府志

秦鰲字子元崑山人嘉靖五年進士授行人擢兵科給事中劾魏國公徐鵬舉中官賴義不法狀義罷還彗星見劾張孚敬如賢病國擬議詔旨輒引以自歸帝遂罷孚敬已孚敬再相

汪鏞承風旨以考察謫鰲東陽縣丞屢遷福建右參議卒官

明史 王志堅傳謫東陽丞後歷樂清知縣九江通判德安同知所至皆有善政陞湖廣僉事湖湘盜起擒殺不可止鰲為薄稅緩役期年盜良已轉參議提督太和山時中官王佐主香案頗為民害因投劾歸後起補福建遷副使入覲還道病聞報遷按察使而卒鰲歷官中外多可稱獨其在省入御史張祿譖論劾大同巡撫王大用大用賢者也以此頗不滿

公論云

梁鳴鸞字九章泉州同知純子好學博覽有知人之識歸有光

幼時鳴鸞一見許以國士嘗作史論四十卷所至必以自隨

嘉靖初以貢授黃岡教諭舟行至青山磯風波大作舟幾覆鳴鸞攝衣危坐數問從者史論在否語不及他晚歸食貧時顧鼎臣在政府家人謀謁之度其必不可乃託他事入舟既而覺之指河水自誓家人惶遽反鳴鸞受業弟子多顯人秦鰲嘗欲刻其書而不果今其書已亡而歸有光所為序尚存

王志堅傳

孫雲字從龍少時父戍死桂林雲徒步往得父骨於昭平堡函之以歸將渡江旋風忽起舟人覺有異得其所函骨擲之江雲躍入江中攫得之泅行里許卒抱函以歸嘉靖己丑登進士授刑部主事進員外郎御史馮恩因星變論大學士張孚

敬方獻夫都御史汪鉉三人姦帝大怒逮下錦衣獄移刑部欲致之死雲抗言曰御史得風聞言事又以星孛應詔何罪即毀譽過當法不當論死議減戍上帝愈怒禡尙書王時中職奪侍郎聞淵俸謫雲朝陽典史又調廣西之懷遠尋遷增城知縣歷陞湖廣僉事福建參議部有礦賊嘯聚千人爲亂雲親率兵勦平之擢江西副使引疾歸雲晚居鄉頗不協衆論者惜之

王志堅傳參攷明史馮恩傳改定

吳中英字秀甫一字純甫生而奇穎好讀書父爲置書千卷恣所欲觀童年入鄉校及長師事黃雲爲古文詞試輒高等縣嘗召役其父中英抵書縣令方豪豪年少有文學莫可當意

得書以爲奇引與游甚歡自是名日益起性豪舉不拘拘小節父卒遺貲甚厚中英視故券有不能還者悉焚之又好娛樂以聲色六博自豪傾其家久之乃更折節自矜平居與其徒考古論學雖先儒已有成說必反覆其所以不爲苟同所獎許多成佳士李憲卿歸有光皆於未知名時預以遠大期之人以爲神而中英猶爲諸生嘉靖辛卯舉於鄉年四十四矣試禮部不第益厭世事營城東地藝橘千株鬻以自給閉門不復有所往還惟令兒女環侍几旁誦詩書而已卒年五十一所著有東臯集

王志堅傳

周復俊字子籲父在弘治壬子舉人養利州知州嘗置義田以

瞻族人建綏成祠祀始遷之祖與族之無嗣者復俊舉嘉靖
 壬辰進士歷工部主事員外郎郎中陞四川提學副使請託
 不行蜀人以刻覈中之後歷雲南副使左布政使遷南京太
 僕卿致仕復俊器度純雅風神韶令弱冠與王同祖顧夢圭
 稱崑山三俊居官貞介三十年如一節少游方鵬之門精研
 理要在滇時與楊慎切劘其學益進所著有太僕集玉峰詩

纂東吳名賢記

張大復傳參
列朝詩集

周大禮字子和崑山人嘉靖壬辰進士授刑部主事坐註誤壽
 寧侯事謫鄧州同知遷汝寧府同知轉南京工部郎中出知
 興化府郡多豪大禮一以法裁之諸豪相與譖於御史御史

初疑之遣吏猝取紙贖簿牘大禮立吏庭下封簿畀之勾校
 無一漏失御史大服遂竭力薦之歲大飢請發廩振貸仿宋
 趙抃救荒法隨地散給自以肩輿行視不間窮鄉幽谷時米
 價騰踊大禮故高其價於是商販輻輳價為立減修本蘭陂
 二十餘里以備旱潦稽覈田賦以清下戶之產廢稅存者治
 郡七載惠政甚多擢廣東副使憂歸服除補山東登萊副使
 御史何廷鈺議鑿膠萊河以便漕輓大禮以河塞日久縱竭
 人力不能成流議遂寢擢河南參政坐大計拾遺免歸

王張
二傳

王三接字汝康初與兄三錫齊名三錫己丑進士守光州年未

三十謝政三接嘉靖乙未成進士授長垣知縣治最有聲而
隣邑御史以私怨欲黜之吏部尙書許讚不聽調浙之景寧
中官奉命開礦三接待不可既開無所得中使慙且怒三接
名益著遷南京禮部主事歷員外郎中出爲柳州知府張岳
統兵征馬平寇議於千蔓村置堡調狼兵守之三接謂狼兵
與土民雜處必不相安請戍以土著之犇必不倍德岳善之
以柳城北枕平野寇警所首及闢舊址更築之因力於兵因
工於餉民不知役柳人賴焉調知澱江府遷河東都轉運使

免歸

張大復傳

李憲卿字廉甫嘉靖戊戌進士授南京吏部主事歷郎中遷江

西參議南昌新建稅額獨浮憲卿奉撫檄折衷均派簡易不
擾轉山東副使備兵臨清寇薄都城聲言從井涇口入掠臨
清人情洶洶憲卿設方略待之已而寇竟不至進湖廣參政
歷河南按察使尋擢僉都御史巡撫湖廣值水災急請蠲貸
親行鄂渚雲夢間撫循倍至會奉天殿災採木湖廣川貴特
擢憲卿副都御史開府江陵摠其事憲卿巡歷所至幾遍三
省凡入山採買簿筏抵京任之諸司道分之三省撫按各有
條理事竣還朝明年掌外計以疾乞歸卒於東平之安山驛
年五十七贈右都御史

王張二傳合纂

張情字約之嘉靖戊戌進士授處州府推官聽訟不尙刻深金

鄉磐石二衛累世構訟不決情探其根株悉爲解散遷刑部
主事乞便養改南京兵部歷郎中出爲九江知府時調三峒
兵備倭所過縱暴情具酒食迎勞之咸感悅而去九江民若
不知有兵者遷福建兵備副使提兵禦倭先後斬獲數百人
以疾請歸卒弟意字誠之少與兄同學情鄉薦時意方弱冠
相者曰法當先兄登第果以嘉靖戊子己丑聯捷授工部主
事遷郎中陞山東副使與御史議獄不合互相糾劾免官歸
家貧不能自存卒後鬻居以葬

張大復傳
縣志合纂

王億字輔之宋王淮後洪武初有福二者徙居崑山祖資以孝
聞舉永樂癸卯鄉試官至檢討父慶尉氏教諭億幼孤奉母

與兄俸及從兄傅切劊爲學母晚歲病魔不寐億臥起榻旁
調攝備至歷數寒暑不輟母病良已每聞兄警欬聲輒屏立
生平所得修脯未嘗異財困諸生四十年甲寅之亂億條上
守城事宜得不敗分司熊某浚瓦浦億上三江圖說水利以
興後以子字貴益杜門却掃里人稱後舟先生

張大
復傳

潘德元字子懋嘉靖甲午舉順天鄉試八上公車不第授商河
知縣土豪殺人波陷士人田明等立訊得實隣邑海豐爲颶
風所湮巡撫檄德元往視請移商河粟賑之不給復請移陽
信之粟亡何陽信飢仍以海豐粟賑之全活甚衆陞承天府
同知戢顯陵中官之橫又景王就國修葺宮殿軍役變生德

元廉得首亂置之法餘皆肅然為同官所中降信陽知州未
期報最擢應天府治中以太倉糧役事罷歸德元能詩兼工
書翰為歸有光所稱

縣志

秦雲字起和隸從子以諸生例入國學授霍州判官山西旱飢
命雲往賑河東使一武官輦致銀數萬兩會懷仁王府祿久
逋王使人簞入府雲宣言於王曰天子憐晉人飢故空帑藏
以活之今民旦暮死王奈何取以為己奉即天子聞王何以
處王慚懼還其銀至則出銀刻案上吏兩旁立稱停裏紙各
書名一不涉手以次俵散民歡呼若更生州有荒田三千餘
頃歲責逋賦於里甲雲發庾粟千石予里甲代耕收麥數千

以償逋調夷陵州嘗被檄治施州獄土司以金百鎰置苞茗
中雲却之遷開建知縣竟不赴歸所著有地理正脉南行稿

史統節略等書

本歸震川集

王應電字昭明崑山人受業於魏校篤好周禮謂周禮自宋以
後胡宏季本各著書指摘其瑕釁至數十萬言而余壽翁吳
澄則以為冬官未嘗亡雜見於五官中而更次之近世何喬
新陳鳳梧舒芬亦各以己意更定然此皆諸儒之周禮也單
研十數載先求聖人心溯斯禮之源次考天象之文原設官
之意推五官離合之故見綱維統體之極因顯以探微因細
而繹大成周禮傳詁數十卷以為百世繼周而治必出於此

嘉靖中家燬於兵燹流寓江西泰和以其書就正羅洪先洪先大服翰林陳昌積以師禮事之胡松撫江西刊行於世應電又研精字學據說文所載譌謬甚者為之訂正名曰同文備考卒於泰和昌積為經紀其喪歸之崑山

明史

周詩字以言風致倜儻重然諾妙於方藥作內經解嘗之京師以詩文游公卿間少試方藥皆神驗欲以尚醫官之拂袖而去游武林匿僧寺中提學孔天孚閱岳鄂王廟題壁至詩所詠大驚立命駕往謁與定交武林人爭延致之詩不憚辭歸與皇甫冲兄弟善遂主皇甫氏初詩之父右與虞山孫艾為死友且死屬詩曰常熟可居居必依孫氏詩無子老且病辭

皇甫氏曰先人之所屬也艾之子未具舟迎之遂死孫氏未葬之孫氏吾谷墓旁表曰虛巖山人周君墓詩著書多不起草成輒散去皇甫淳以書規之今所傳虛巖山人集者淳詒書後所存而素問箋解卒無傳焉

列朝詩集

周美字濟叔少穎慧強記然食貧無師先達沈大楠一見竒之引與其子紹慶同學因授以易遂精其旨登嘉靖甲辰進士至庚戌紹慶亦成進士而周氏易遂名吳中美初授進賢知縣清強有守治最入覲謁政府獨無贊遷刑部主事進員外出為湖廣僉事備兵蘄州蘄當洞庭彭蠡之交稱盜藪美至立團操法作戰艘令材官日游巡江上獲盜獄成即殪之或

折其脛盜相戒無敢犯撫按以採木令急議發興山礦以助大工美曰礦入天府泰山抔壤耳亡命一聚利不補害事竟寢陞四川參議遷廣東副使外艱歸有為蜚語達京師者誣以受贓枉法遂致仕感憤不平以狂疾卒

王張二傳合纂

王繼孝字子忠祖鑑字與修天順壬午舉人好讀尚書以忠孝自勵成化辛未上春官卒於逆旅繼孝舉嘉靖己酉鄉試授龍南知縣縣居萬山中多賊巢繼孝至即擒妖僧數十人上司時檄視他縣事繼孝往來諸縣詢民疾苦與地形險易皆知之葉楷者故安遠弁據黃鄉作賊擁驍健三百人僭立功王廟奉其先春秋殺人以祭莫敢誰何巡撫檄繼孝往諭之

繼孝馳至黃鄉楷知其為廉能吏備賓主禮迎問曰君降楷耶安之也繼孝笑曰此來自有處置因密諭諸脅從者以歸誠之利眾心稍懈乃伏兵龍南自提兵猝臨賊賊躍馬馳斷其馬足又斬巨魁三四人賊窘甚自焚死加知府銜調繁寧都為忌者所論免歸

張大復傳

周後叔字嗣昌其先有名壽誼者生於宋淳祐四年甲辰歷元至明洪武六年年百一十歲知府魏觀行鄉飲酒禮首賓之高帝召見賜宴子冠帶後年百一十六歲而卒後叔其八世孫也登嘉靖庚戌進士授工部主事視權荊州以寬簡稱遷員外郎楊繼盛劾嚴嵩坐死後叔賦詩哭之又其騎與嚴世

蕃爭道世蕃怒屬吏部撫其過謫武岡州同知尋遷金華府同知郡有劇盜出沒爲害後叔令所任市魁闖入伴與之通盡得其虛實以告勒卒覆其穴盡平之滿三載進知府坐與

御史爭試事被劾歸

王志堅傳

顧章志字行之濟子嘉靖癸丑進士授行人時嚴嵩子以美官餌士士爭趨之章志獨弗往歷司副司正刑部員外郎中出知饒州府饒俗囂訟吏深文爲奸章志至不動聲色已徐得其要領一日召諸吏立庭下扶其尤貪黠者數人咸惴惴莫敢犯有訟者立決遣後待訊者不費糧以爲常景德鎮姦人與安仁豪競利而鬪揭竿嘯呼者以千數章志適行部至諭

以禍福立解散徐捕其首事者寘諸法擢湖廣副使乞養歸母終服除補廣西副使尋進貴州參政貴州按察使乞休家居七年復以原官補山東旋陞南京光祿卿應天府尹進南京兵部右侍郎南京馬快船爲上供所需皆衛卒領之猝有差遣每爲中官所摧剝卒多逃亡軍伍日虛章志奏請募篙師充役而稍益其直減船額就之歲約費二萬五千金米三萬石今衛士願輸者已得萬五千金又願除額給米二萬朝廷但捐銀萬兩米萬石以佐之則費小而惠大上從之遂著爲令亡何卒於位其喪歸衛士焚香哭於道詔贈右都御史子紹芳字實甫萬歷丁丑進士選庶吉士授檢討充日講官

遷左贊善請假歸尋卒紹芳事親至孝友愛二弟甚篤性廉介一介不苟取有詩集若干卷弟紹芾字德甫為諸生博學

工詩兼善書法

王張二傳合纂

陳淮字禹治父周為新昌令改教青州卒淮持父喪歸遇盜淮抽矢擬之盜引去當時武健年少爭傳為盛事而淮故以文章自負每下筆滾滾不休嘉靖甲寅倭寇至淮請授甲扞東城賊梯木將登淮發弩連斃四人轉攻南門淮復斃二人城中人人自奮號為陳先鋒明年賊酋五十七人入靈巖山梟悍莫禦淮率家丁詣督府請自効督府壯之授藍號信幟督領嚴家兵馬為奇兵衝突兵未集猝與賊遇淮揮刀馳之接

戰甚力莫有應者遂遇害家丁吳循文瑞來祥皆死之越二日得淮屍色如生後三十餘年遺生子應期舉於鄉瀝血上訴詔旌其門立忠烈祠祀之時邑有陸懋者字邦美有姊嫁蔣氏父特愛之賊譟西北城懋在城上見姊與其夫為賊所執將加害懋投而下跪泣請曰殺姊必死吾父乞代姊死以全父賊感動釋其姊姊夫令懋負擔懋度姊去稍遠提擔撲賊賊逐之懋走叢棘間傷足遂遇害懋兄愚慟哭城上亟識其處圍稍解按衣禱求之髑髏眼閃閃動與頸合遂藁葬城西

復傳

蘇州府志 卷五十九
張憲臣字欽伯嘉靖己未進士授南昌知縣初至積案如山黠吏操牘雜進以試令憲臣權其緩急無敢溷者御史段某行縣問庫羨幾何意欲以饋嚴嵩憲臣曰縣無他羨有之乃三殿工羨耳御史怒課其職甚嚴然無所得亡何嵩敗拜工科給事中疏論賦役水利四事又論武庫甲仗不宜盡屬中官兩畿試不宜誘教官咸報可歷吏刑二科進戶科都給事申三疏論國漕大計悉下所司行之出爲浙江參政先是礦寇之平多藉義烏人力後乃驕橫難制憲臣錄其豪自隨躬爲訓練而餼之由是人知自愛遷雲南按察使都御史某以憲臣前在省中曾有糾劾修郤論免歸孫魯唯萬歷癸丑進士

福建左布政使魯得天啟乙丑進士知縣

王世貞誌參縣志

張自新初名鴻字子賓居新洋江口少孤好讀書敏慧絕出家貧與兄耕田養母兄爲里長每遇催科受撈掠自新輒詣縣自代縣吏恠其意氣方授杖輒止曰而何人者對以書生試之文立就慰而免之弱冠授徒他所歲歸省三四敝衣草履徒步往返爲其母具酒食兄弟酣笑以爲樂視豪勢不爲意議論古今意氣慷慨補弟子員俄得疾卒其爲文博雅而有奇氣人無知者惟吳中英獨稱之

歸有光張自新傳

鄭若曾字伯魯文康五世孫幼有經世志凡天文地理山經海籍靡不周覽嘉靖中以諸生入北雍闈中擬元者再竟不遇

就選亦未仕倭擾東南總制胡宗憲摠兵戚繼光延若曾入幕中參贊機務後以叙功論授錦衣職力辭弗受所著有江南經略籌海圖編及八閩志日本圖纂等書

縣志

秦霑字光甫本上海人父奎以避仇徙崑山霑年十七補諸生而族仇陷其父成大獄霑投牒訴御史時御史已有所入怒杖霑十五叱之出召獄吏入其父死目中霑度事已急伺吏入探其衣得病狀則父名在焉乃大哭與俱白太守曰父中仇非法也今又不死法而死吏如天道何言訖淚蔽面眦盡裂太守憐之為白御史得少緩後霑竟白他使者得解父出尋病卒嘉靖三十一年舉於鄉隆慶中授德化知縣時方中

倭霑為均其徭稅與民休息丁祖母喪歸服闋補知寧陵縣有大盜更兩令不能得霑授方略立捕僂之無何卒於任霑歷兩縣遇事立剖獨於疑獄必重持之曰向者父獄起吾仰視堂上人猶狼虎也今我坐堂上庸知堂下人不狼虎我耶故所至嚴而不殘云

王張二傳合纂

王逢年字舜華初名治字明佐司業同祖之子少為諸生試經義多入古文奇字為有司所黜往謁袁煒於政府煒以故人子厚遇之令草應制文字有所更竄退而上書曰閣下以時文取科以青詞拜相惡知天下有古文哉不辭而去煒遣騎追之不得及渡淮困於旅人淮陰人魯道者少從李夢陽學

詩徒步追逢年於逆旅資之以歸輯其詩曰海岱集王世貞序之盛相推挹逢年顧時時指摘王李詩嗤爲俗調世貞怒而排之逢年益自負作五敵詩謂慢世敵嵇康綴文敵馬遷賦詩敵阮籍述騷敵屈宋書法敵二王著書一編曰天祿閣外史妄男子輯東漢文誤入之益自負以爲當吾世得追配古人也年七十五無疾端居取所書金剛經捧持而逝列朝詩集俞允文字質甫一字仲蔚父璋登正德辛未進士終南京大理評事允文十二而孤家貧奉其祖母及母以孝聞十七補郡諸生好讀書時爲詩歌及古文詞而不樂舉子業又善病遂一意隱居邑人歸子建嘗以其作示吳中英中荅書曰所

示詩文得非俞君質甫之作乎近歲吾崑古學幾熄響矣將來振起者其在斯人歟後張寰偕之謁文待詔及赴茗上詩社所至推爲土客王弇州意不可一世獨折節友之其同志號稱七子者聞其名皆願與之交允文名由是日起部使者與郡邑諸公道崑必禮其廬而允文益謙慎自牧終歲不至公庭有不可已者僅於舟中一報謝而已楚藩以修書聘郡守以修志聘皆辭以疾晚節詞翰尤工乞者踵接於門卒年六十七有集若干卷王志堅傳

薛學敏字君叔工文善書與俞允文梁辰魚切劘晚益工詩王世貞謂讀之如遊輞川清月映郭淪漣上下同時夏暉字士

琰王庚字于載俱以詩文名有城南倡和稿通志

歸有光字熙甫崑山人九歲能屬文弱冠盡通五經三史諸書師事同邑魏校嘉靖十九年舉鄉試八上春官不第徙居嘉定安亭江上讀書談道徒常數百人稱為震川先生四十四年始成進士授長興知縣用古教化為治每聽訟引婦女兒童案前刺刺作吳語斷訖遣去不具獄大吏令不便輒寢閣不行有所擊斷直行已意大吏多惡之調順德通判專轄馬政明世進士為令無遷倅者名為遷實重抑之也隆慶四年大學士高拱趙貞吉雅知有光引為南京太僕丞留掌內閣制勅房修世宗實錄卒官有光為古文原本經術好太史公

書得其神理時王世貞主盟文壇有光力相舐排日為妄庸巨子世貞大憾其後亦心折有光為之讚曰千載有公繼韓歐陽余豈異趨久而自傷其推重如此有光制舉義湛深經術卓然成大家後德清胡友信與齊名世並稱歸胡明史歸有楨字養素父年六十一而生口授以經輒成誦年十八為人師二十父歿居喪哀毀處師席者五十餘年素不禮於長兄長兄死次兄復盡得其腴產有楨知而不言率其庶弟居於宅之西偏既而兄姪輩析產蕩盡有楨每賑恤之歿為棺殮年九十無疾而終縣志

王執禮字子敬秩孫少孤貧力學從歸有光受經因旁及子史

有光每日可與評論古今者獨子敬一人而已嘉靖乙丑與
有光同登進士授建寧府推官按臣胡某意在發摘隱伏執
禮謂當治貪吏豪強耳賣菜傭安足問哉意頗不合然保全
實多有張生者誣貧民爲盜執禮出之張故大族姻黨多貴
顯力爲營救執禮持不可曰殺人以媚人吾不爲也竟論如
法入爲南京刑部主事尋改北以母老乞終養凡十年母卒
服除補儀制司主事歷尙寶丞光祿少卿大理丞應天府丞
年七十卒執禮生平未嘗一日廢書兼通醫術子樹古樹惇


能世其業 王志堅傳

王執法字子欽遺腹生蚤慧受學於兄執禮領嘉靖辛酉鄉薦

執禮成進士官建寧執法杜門養母有閩客持千金相餉執
法操之門外曰急去勿污我萬歷癸未謁選得廣平府通判
在郡五年常俸外一毫不取署永年縣墾水田鑿義井大爲
民利遷建寧同知不赴歸尙書王世揚嘗謂給事張棟曰生
平所見廉吏如廣平王別駕指不多屈也年七十五卒 王志堅傳

參張大復傳

王伯稠字世周其先常熟人移家崑山父冕字元肅多長者交
王雅宜白雀帖所謂元肅參軍有精廬在虞山下去白雀不
遠者也伯稠少有俊才父攜之入京師見城闕戚里之盛輒
有歌咏時號神童王世貞在刑部請與相見曰故是吾輩人



入順天府學爲諸生非其好遂謝去肆力歌詩閉門擁被悉取晉唐以下諸家吟咀諷詠稍閒則棲止禪院或留連狹邪旬月不知所之對客不問姓氏無寒暄語遇酒炙放箸大嚼竟坐或不交一言與王逢年爲中表兄弟其依隱傲世略相似焉

列朝詩集參張大復傳

張應武字茂仁福建副使情之子從歸有光游上窮六經下鈎諸史抵掌論古今人物山川阨塞兵農戰守之事皆若身在其閒料當世事無所凝滯自負其才以爲食貨可足邊陲可安伊洛關閩之書無所不觀而獨不好其言以爲非儒者所以經世之具嘗慨三吳水利不修操小艇出沒太湖吳淞閒

著水利論三篇一時公卿咸與商榷所著述甚富

王志堅傳

沈楠星溪里人七歲喪父迨長與衆雜耕隴上竭力奉母姜氏嘉靖癸丑母感痰疾迎醫療治不瘥乃齋戒盟於佛前割左乳煨末點湯以進時母口已閉取匙灌之盡乳而醒三年母復病傷寒絕矣又割其右股如初母病立愈御史周如斗爲請於朝旌其門

張大復傳 又曰吾鄉有庠生顧允烈割股療母人莫跡其所在近世太學生許獻吉亦

割股療父至執喪不能起人始知之

歸繡字華伯販鹽以養母已又坐市中賣麻與弟終緯友愛無間緯以事坐繫繡力爲營救至數四耗其母錢終無愠容繡妻朱氏每製衣必三襲曰二叔無室豈可使君獨被完潔耶

叔之亡妻有遺孤撫之如已出

王志堅傳

柴秩字虞叙奇季子十歲通春秋二十八太學時島夷通市者剽掠歲見秩策其必內訌與姪輔元謀講求戰守之具訓練丁壯多蓄弓弩油蠟之屬人或笑之甲寅四月倭寇猝至縣令祝乾壽募民城守素知秩才令守牛橋灣乃攻圍最急要衝也秩與輔元率合族家丁三百人禦之輔元字子貞能左右射善矛槩尤長大刀城守四十六日矢無虛發遙見火光連弩射之斃其四酋羣倭昇酋長牛角大王至城下一箭貫其顱有乘夜梯城者投三百斤石殺之秩又募壯士夜往新洋江燒賊船六十餘艘倭始懼不敢犯東城尋解圍去秩與

輔元絕不言功惟祝令深加嘆服方城守時民駭走多枵腹秩出粟炊熟截竹為器盛貯道旁以濟其飢全活甚眾就選授浙江布政司都事攝臨安篆築隄以防海水陞寧州判官署本州事廉明甚著念母夏年老遂請終養歸母卒哀毀骨立人稱至孝所著有西湖吏隱稿怡顏堂雜集縣志張士瀾字心父祖寬弘治乙丑進士歷廣東僉事父廷臣字元忠嘉靖戊子舉人詩文為王世貞所稱士瀾父歿後被誣至構訟傾其家已又罹重役困甚遂去之留都僦屋以居少工詞賦以作者自命於是賦樂貧又賦樂元詞旨悽惋讀者悲之留曹有知其才者為買田以贍焉士瀾益折節讀書敷文

析理無虛畧每一篇出觀者無不傾心時從名雋放浪山水
閒忘其身之困也遭母喪益自傷邁疾卒年四十七所著有

張心父集國朝文纂

王志堅傳

丁允亨字孟嘉嘉靖壬子領鄉薦萬歷間始授太湖教諭著太
湖志無濫者陞臨漳知縣縣故有隄以禦漲水歲久湮沒一
望沮洳猝遇暴雨衝激及城允亨請依故址修築凡築隄四
十五里高一丈二尺廣倍之工食調度不以煩民至今賴之
又買張氏廢園營新署客至如歸亡何卒於任柩歸漳民巷

哭如考妣

王志堅傳

蘇州府志卷第五十九 終

蘇州府志卷第六十

人物十四 崑山縣

明

陳允升字晉卿隆慶戊辰進士除開州知州州有種馬一千六
百分派孳生輪戶輸之京師有銀差力差銀差解銀猶易力
差解馬最難勢豪多占易者小民獨任其難率多破產允升
按冊均撥始不病民又以重役無如均徭先取編戶按甲乙
列為九等又隨地隨人詢其利害使書於簡期年戶口消長
之數瞭然徭乃大辦擢兵部員外郎陞湖廣提學僉事精於
衡鑒丙子秋將放榜先書所拔士二十一人縣而揭之果皆

報雋允升開敏有才勇於赴義其自楚歸也歲大祲以書抵張居正祈蠲賑詞旨激切吳民賴焉年七十二卒子如京字鄂州萬歷甲午舉人為台州府推官慮囚多平反嘗視篆太平削掛馬包等弊省民脂數千卒於官

張大復傳

許承周字公旦隆慶戊辰進士授蕭山知縣築西江北海二塘以捍江海役成而民不知人稱許公塘吏陳夢鯉等侵牟公帑立收配遣俗以嫁女多費生則溺之承周為定婚禮溺者連坐遂變其俗長山諸里白骨彌望為義冢瘞之期年大治亡何鄰邑僉事陳某官江西歸過蕭山用舁夫百許榜掠候吏至死承周上其狀於臺司陳造蜚語間之執政坐罷歸蕭

山人祀之子觀吉萬歷丙辰進士官工部郎中

縣志

王炳衡字伯欽同祖孫隆慶辛未進士授歷城知縣愛民造士有古循吏風調臨安縣會上計杜門不造謁竟以是免歸既歸坐臥一小樓不盈十尺所居近留暉門有譙樓甚敞每邀客嘯詠其上自號留暉主人弟炳璿字幼文萬歷甲戌進士知上饒縣多異政入為刑部主事遷員外郎出知德安府嘗校德安士無當意者唯拔童子七人皆稚小炳璿語之曰德安待汝等而第必勉之後七人皆第久之覲歸里門病卒

張大復傳

陳敬純字吉甫負氣敢言能為淹博藻贍之詞名聞四方學者

爭來請益敬純援證今古千言俱下令人應接不給浮沈覺
 校幾三十年隆慶初貢入太學張居正作拱日樓成有客請
 敬純賦之署客名以進居正訝曰故有五經庫其人耶客以
 敬純對居正諷選人以翰林孔目相處而敬純謁選時衣紗
 衣偃蹇堂下遂授儀封主簿又以傲睨諸監司免歸張大復傳
 支可大字有功萬歷甲戌進士授禮部主事歷員外郎郎中出
 為廣東提學副使移疾歸十年起為浙江提學歷江西參政
 應天府丞陞湖廣巡撫征播之役可大移鎮沅州降九服白
 泥諸寨又破黃岑高巖乾溪寶兒圍遂入播七戰塘保破板
 角關三戰煉坪克苦菜關播平蔭一子告歸卒張大復傳
按明史宦官

傳言稅監陳奉在湖廣恣行貪虐慘毒備至士民公憤甘與
 奉同死而巡撫支可大曲為蒙蔽後奉誣逮武昌兵備馮應
 京楚民切齒誓必殺奉以可大護奉焚其轅門及奉歸京金
 寶財物鉅萬計可大懼為民所掠多與徒衛導之出疆楚民
 無不毒恨者可大之阿附陳奉史傳章章人物傳乃言奉欲
 構大獄可大揭其詐稱陞辭密語及沙市鼓譟顛末為上分
 別言之上心動獄旋解遮掩粉飾何足取信至征播之功惟
 李化龍及劉綎最著可大亦因人成事而已人物傳乃謂可
 大長驅入播十戰克捷之後經略始至受成事遂以播功延
 世賞而可大特任一子而已論者為之扼腕此亦虛誇之語
 今以舊府志已載姑存征播一節餘俱
 刪削特為證明且以見邑志之難信也

朱熙洽字鴻甫萬歷甲戌進士授潛江知縣縣故土城當漢水
 下流善崩潰時議改築磚城而費無所出熙洽設方略覈民
 田之詭寄漁課者令民入贖自占四閱月而築城之役竣田
 賦亦清遷南昌府同知調辰州入為刑部員外郎歷福建僉

事晉參議陞貴州副使所至皆以清嚴著熙洽才識練達嘗語人曰吾三日不視事則神不凝一日課數十事則手足矜奮腰膂有力年八十三卒孫日燦字靜之萬歷壬子舉人官工部員外督臨清廠有守城績

王張二傳
縣志合纂

張棟字伯任崑山人

縣志士
淪子

萬歷五年進士除新建知縣徵授

工科給事中請盡蠲天下逋租格不行時蠲租例相沿但蠲存留不及起運棟請無拘故事從之再遷刑科左給事中吳中白糧為累民承役輒破家棟請令出貲助漕舟附載申時行王錫爵絀其議棟遂移疾歸起兵科都給事中劾去南京戶部尚書張西銘刑部侍郎詹仰庇軍政拾遺劾恭順侯吳

繼爵宣城伯衛國本忻城伯趙泰修宣府總兵官李迎恩繼爵留餘並罷已言邊臣敘功不宜及內閣部科帝亦從焉遣視固原邊備時經略鄭洛方議和棟言捲刀克負固不歸卜失兔傑黠如故火落赤真相雄據海上不可使洛委責以去因論兵部尚書王一鶚會一鶚已卒洛亦報捲力克東歸遂寢其奏棟又言洮河失事陛下赫然震怒命洛視師豈止欲其虛詞媚敵博一順義東歸畢事耶今火真依海為窟出沒自如不宜敘將吏功報聞二十年正月禮科都給事中李獻可偕六科諸臣疏請豫教元子帝怒貶獻可秩調外餘奪俸棟與諸科臣各上疏救帝益怒並削籍既歸奉母甚孝母卒

棟年已六十毀瘠廬墓竟卒於墓所天啓中贈太常少卿

明史

弟文柱字仲立年十二賦關山月詩一坐嗟賞舉萬歷戊子

順天鄉試事母甚孝嘗與兄約他日貴顯當更互出入棟以

言事罷歸文柱乃謁選得臨清知州勵精爲治在州四年以

積勞病卒州人如喪考妣云

縣志

李同芳字濟美萬歷庚辰進士授刑部主事遷禮部員外郎進

郎中時上將幸西山閱壽宮舊例費鉅萬同芳曰禮官不止

遊幸更導之耶爲削去煩例上之出爲浙江提學副使絕造

請精藻鑑所拔多名士陞湖廣荆南道參政清澧州浮糧三

千石卻標兵操賞餘銀三百六十兩止征播調發萬人雪冤

辟張福祖等七命陞貴州按察使黔會安氏方強請與太守

班見叱之出班又請復定番新貴故疆片言折之亡何其庶

孽安國貞以困辱來歸力請巡撫勿受後國貞跳入西川會

以索叛人爲辭殺蜀人六萬餘改廣東參政旋進按察使會

稅礦兩璫在粵議增稅條同芳執不可新會令阿璫指致民

變同芳單車定之陞山東布政使覈登萊民屯以抵兵餉歲

減額編四萬有奇立常平倉買穀十萬石貯之乙卯大饑民

賴以濟尋擢副都御史巡撫山東是時福王封於洛陽賜莊

田四萬頃詔覈涇漢故籍以充之同芳抗疏力爭遂請告歸

卒贈工部右侍郎子允昌字文長庚子解元辛丑進士官翰

林院編修

舊府志

徐應聘字伯衡刑部主事申曾孫祖一元交河主簿在太學與嚴訥善時江南被倭歲復大祲一元計惟免漕可以救之乃密草一疏焚香祝天授訥令奏上竟得俞旨東南之民賴再生焉應聘少有才名舉萬歷十一年進士改庶吉士授檢討二十一年京察中蜚語當謫拂衣歸座主沈一貫當國數招之不出家居十餘年始起行人司副遷尙寶司丞再遷太僕少卿卒官

明史一元事別

採舊府志增入

傅遜字士凱嘉定人徙崑山萬歷間以歲薦為崑縣訓導授建

昌教諭選傅河南王以歸遜長八尺偉儀觀喜談當世之務

少師事歸有光嘗以左傳體本編年而紀載繁博讀者急不
得其要領乃仿袁氏紀事本末為一書以事為主首王室次
霸國以類相從顛委頭緒開卷瞭然讀者便之又以杜註時
有未當為之辨其訛謬名曰左傳屬事行於世時同邑陳可
言字以忠撰春秋經傳類事三十六卷與遜書相似而遜獨
傳

王志堅傳參張大復傳

諸壽賢字延之崑山人萬歷十四年進士既釋褐上疏願放歸

田力學十年然後從政章下所司寢不奏會南畿督學御史

德清人房寰連疏詆都御史海瑞同年生顧允成偕壽賢及

彭遵古抗疏劾之言寰如賢醜正不復知人間羞恥事臣等

自幼讀書卽知慕瑞以爲當代偉人寰大肆貪汙聞瑞之風
宜媿且死反敢造言逞誣臣等所爲痛心因劾其欺妄七罪
政府庇寰謂三人不當出位妄奏奪冠帶還家省愆久之起
南陽教授入爲國子助教擢禮部主事戚里中貴干請輒拒
之遭疾請告歸授徒自給久之卒

明史

顧允元字懋善父夢羽蘄州同知以清操著允元萬歷丙戌進
士授甌寧知縣爲政持大體婦孺皆得前陳訴而執法不少
假借地產鐵冶水灌田田盡赅允元疏免其稅立開煎之禁
民賴有秋閩俗溺女又蓄婢至老不嫁皆設法禁之內艱歸
以暴疾卒子天敘字禮初萬歷戊子鄉薦選鉛山知縣時礦

使方張羣盜假其威縱暴山谷天敘擒四十餘人寘之法憂
歸服闋補元城縣縣與河南接壤爲潞藩舟楫取道私鹽窟
穴天敘嚴立禁防積弊遂絕魏地多大剝其僧習爲不法郡
守欲盡逐之僧大譁天敘曰逐之不若安之立保甲連坐法
使與編戶等僧遂不敢爲奸調嘉魚縣以子錫疇貴棄官歸
屏居三十年及兩都淪亡憤悶欲絕趣子南行錫疇不忍舍
曰吾自盡吾當盡之節汝自爲汝當爲之事遂絕粒死年八

十一縣志

陸夢履字元禮萬歷己丑進士授刑部主事出爲荊州知府覲
畢過家父疾留侍湯藥者六月而父歿服除有修御者持之

左遷山東運同至則覈課引追逋丁丈園畝清編戶鹽政一新遷知雷州府東人詣臺請留改守東昌時方旱蝗河工復急夢履一意拊循尋遷沂州副使東人又請留再改東昌兵備稅璫馬堂貪暴士民聚眾焚其廨擊殺其黨夢履苦心調劑請撫按奏減東稅三之一而懲首亂一二人以弭禍以兼攝三篆積勞卒於官東人立祠祀之

縣志

王臨亨字止之三錫孫萬歷己丑進士授西安知縣邑多盜以參伍法相鈎詰盜無所容鞠獄輒得其真民不敢欺會有海警調知海鹽縣至則急繕城垣公帑不足取之俸緩不費民間一錢邑豪有結黨稱十龍者甚橫廉得其殺人狀相繼笞

死民大悅遷刑部主事恤刑廣東故事減大辟不得過百人臨亨平反至二百餘人吏執案請臨亨曰我知活人耳寧計駁耶高涼有盜珠者中官張其事坐六十人劫盜俱論死巡按不能救臨亨念激之則相持益堅乃故為好言以動之遂得減死遷雲南司郎中掌都下獄緹騎羅織希功賞臨亨分別輕重多所寬釋都人語曰遇蘇人則生謂臨亨與同舍郎巖激也出為杭州太守未任卒年四十六臨亨為人孝友內行修整生平恂恂言不出口至為吏則精明振作發摘奸伏如神亦天性也西安海鹽皆祀名宦三子志堅志長志慶皆知名時稱一鳳三雛云

文震孟張大復兩傳合纂

蘇州府志 卷六十一
柴大履字旋父刑部主事泰曾孫少孤貧不能從師每聞村塾講誦聲徬徨其側輒有開悟故人顧茂尹竒而館之令與諸子游中萬歷壬辰會試乙未成進士授中書舍人陞兵部員外郎典試廣西得人稱盛丙午假歸暴卒大履性孝友持身廉自廣西便道歸省兄大觀不能自給畢出其瘠以進母兄在職方久饋遺無所受歸里後有故弁以千金謁者峻拒之甫別而歿歿後無半畝一椽無子妻費孀居四十年日織布一匹自給終身未嘗服綵

張大復傳
參縣志

歸子慕字季思震川先生有光季子少俊才好讀書嘗與時輩結社以詩文自喜不屑屑爲經生言時一爲之輒趨絕一時萬歷辛卯舉於鄉試禮部不利先是無錫高攀龍以行人言事謫家居與其徒講性命之學乙未春子慕從京邸識嘉善吳志遠還過錫山因志遠識攀龍一見如故自是始留心理學既三試不第又兩喪婦得羸疾遂不赴公車築室崑之西村曰陶庵縛茅爲屋插槿爲牆舍後樹梅庭藝菊花室中自琴書外一鑪一藥囊一瓶粟而已時高吳皆屏居江村三人遞相過從對坐不語終日凝然見者不知其所事也平日不詣府縣不受餽遺不與衣冠之會卽宗黨爭訟子弟應試一切置之不問然養寡姊撫弟婦之孀居者咸盡力病久不止遂卒年四十四崇禎初有詔搜訪遺逸廣勵風節御史祁

彪佳以子慕應詔追贈翰林院待詔

高攀龍王志堅兩傳列朝詩集合纂

王在公字孟夙德安知府炳璿子萬歷甲午舉人授高苑知縣持廉秉公尤慎聽斷樂安有李甲者論大辟願改讞高苑其獄經八招又經新守詳允矣在公鞫得其寃力請於守遂得白嘗遇旱禱羣望手書疏達旦不寐禱畢於臨淄界中得雨明日知雨止高苑其臨淄界二十里有雨則在公車轍所屆也是歲青州惟高苑大稔遷濟南府同知署府事歲餘以廉辦聞一日忽語蒼頭欲謝去遂投劾歸抵吳門竟不過家至徑山天目渡錢塘遊天台雁宕已又從廬山沂江入蜀往峨眉嶺一載還吳悅吳之石孟山結廬以居十餘年卒

王志堅傳

王安鼎字孺和少沈靜異常兒稍長工舉業泛覽子史詞賦及內典時為詩篇皆俊逸不羣書得率更北海筆意與人交涇渭了了而處之渾然於世味無所競母梁氏性苛而望奢安鼎為諸生數竒家又貧母責望無已小不愜意輒詬罵至累日無所容安鼎必謝免一切獨居屏息候少解則為婉容輕身以進然猶不能盡當意或跪之庭猝遇雷雨不敢易處幼女夜啼母怒提寘中庭凍而死安鼎夫婦摧謝而已不敢哭安鼎以是苦多病平居骨見衣竟以病卒

王志堅傳

秦瓚性至孝居市廛業販米所獲甚微而父性豪俠必惟命是供父卒營葬不遺餘力嘗繪遺像以祀一夕夢其父語之曰

吾目邊有一斑而忘之耶其孝思感動如此奉母極甘旨見母嘗戚戚瓚意其在女也即遷至家周卹備至

縣志

李文詠

縣志字蒼石

崑山諸生父大經沂水知縣萬歷二十七年父

寢室被火文詠突入將父抱出而榱棟盡覆父子俱焚死火息入視屍猶覆其父父存全體文詠獨餘一股

明史

葛錫璠字中恬萬歷辛丑進士授刑部主事遷員外郎有兵部尚書私人受戎帥賄事露屬刑部庇之錫璠執不可卒按以法尚書引去出為兗州知府甫下車歲旱民饑力請賑濟躬歷二十七城全活甚眾他善政甚多去兗之日涕泣送者塞路擢河南分守道福王就封之雒陽從者多擾民錫璠笞其

尤一二人乃不敢動會有旨賜福邸莊田十萬畝必取稅之不入者合三省給之奸民有借讐家田投牒縣官者錫璠立寘諸法靈寶大盜聚黨千人將為亂密授方略殲其渠魁餘黨散走中州以安進山東兗西道參政未行陞河南按察使請歸養卒贈太常寺卿子鼎字端調崇禎庚午舉人與兄鼎刊刻經史古文校讐精審世稱葛板

縣志

王志堅字弱生臨亨子萬歷三十八年進士授南京兵部主事遷員外郎郎中暇日要同舍郎為讀史社讓讀史商語遷貴州提學僉事不赴乞侍養歸天啓二年起督浙江驛傳奔母喪歸崇禎四年復以僉事督湖廣學政禮部推為學政第一

六年卒於官志堅少與李流芳同學爲詩文法唐宋名家通籍後卜居吳門古南園杜門卻掃肆力讀書先經後史先史後子集其讀經先箋疏而後辨論讀史先證據而後發明讀子則謂唐宋而後無子當取說家之有裨經史者補之讀集則定秦漢以後古文爲五編考覈唐宋碑志援史傳據雜說以參覈其事之同異文之純駁其於內典亦深辨性相之宗作詩甚富自選止七十餘首明史弟志長字平仲崇禎庚午舉於鄉篤志經學尤精三禮毛詩嘗曰周禮儀禮文義古奧眞聖人之書若禮記僅堪爲二禮疏解耳乃刪二禮註疏採漢以後諸儒之說翼之名曰註疏刪翼其學詩也宗毛鄭略朱

註於說詩之書搜羅殆盡彙凡四易他所纂輯甚多志慶字與游天啓丁卯舉於鄉三上公車不第詔舉賢良當事以名聞辭病不赴葺東郊墓傍丙園作終老計生平癖好讀書晝夜有課所著有慎爾堂及丙園詩文彙其讀史所著尤多性孝友居喪哀毀三年不御酒肉事兩兄篤敬終身無間縣志張振德字季修崑山人福建副使情之孫由選貢生授四川興文知縣縣故九溪蠻地萬歷初始建土牆數尺戶不滿千永寧宣撫奢崇明有異志潛結奸人掠賣子女振德捕奸人論配之招還被掠者三百餘人崇明賄以二千金振德怒卻之裂其牘天啓元年方赴成都與鄉闈事而崇明部將樊龍殺

蘇州府志 卷之十一
巡撫徐可求副使駱日升李繼周等重慶知府章文炳巴縣
知縣段高選皆抗節死賊遂據重慶時振德兼署長寧去賊
稍遠從者欲走長寧振德曰守與文正也疾趨入城長寧主
簿徐大禮與振德善以騎來迎振德卻之督鄉兵與戰不敵
退集居民城守會大風雨賊毀土城入振德命妻錢及二女
持一劍坐後堂曰若輩死此吾死前堂乃取二印繫肘後北
向拜曰臣奉職無狀不能殺賊惟一死明志妻女先伏劍死
乃命家人舉火火熾自剄一門死者十二人賊至火所見振
德面如生左手繫印右手握刀忿怒如赴敵狀皆駭愕羅拜
而去事聞賜祭葬贈光祿卿謚烈愍敕有司建祠世蔭錦衣

千戶

明史

蔡懋德字維立崑山人少慕王守仁爲人著管見宗良知之說
舉萬歷四十七年進士授杭州推官天啓初行取入都同鄉
顧秉謙柄國懋德不與通秉謙怒以故不得顯擢授禮部儀
制主事進祠祭員外郎尙書率諸司往謁魏忠賢祠懋德託
疾不赴崇禎初出爲江西提學副使遷浙江右參政分守嘉
興湖州劇盜屠阿丑有衆千餘出沒太湖懋德曰此可計擒
也悉召瀕湖豪家把其罪簡壯士與同發遂擒阿丑內艱服
除起井陘兵備歲旱懋德禱卽雨他鄉爭迎以禱又輒雨調
寧遠以守松山及修臺堡功數敘賚會災異求言懋德上省

過治平二疏規切君相一時咸笑爲迂懋德好釋氏律身如
苦行頭陀楊嗣昌謂其清修弱質不宜處邊地改濟南道濟
南新殘破大吏多缺人懋德攝兩司及三道印遷山東按察
使河南右布政使田荒穀貴民苦催科賊復以先服不輸租
相煽誘懋德亟檄州縣停徵上疏自劾詔鑄七級視事十四
年冬擢右僉都御史巡撫山西召對賜酒饌銀幣明年春抵
任討平大盜王冕十月統兵入衛京師詔扼守龍泉固關二
關李自成已陷河南懋德禦之河上十六年冬自成破潼關
據西安盡有三秦十二月懋德師次平陽遣副將陳尙智扼
守河津山西京師右背蒲州北抵保德悉鄰賊依黃河爲險

然窮冬冰合賊騎得長驅懋德連章告急請禁旅及保定宣
府大同兵疾赴河干合拒中朝益積憂山西言防河者甚衆
然無兵可援懋德以疲卒三千當百萬狂寇時太原洶洶晉
王手教趣懋德還省十八日懋德去平陽二十日賊抵河津
自船窩東渡尙智走還平陽二十二日賊攻平陽拔之尙智
奔入泥源山中二十八日懋德還太原明年正月自成稱王
於西安賊旣渡河轉掠河東列城皆陷於是山西巡按御史
汪宗及上言曰晉河二千里平陽居其半撫臣懋德不待春
融冰泮遽爾返旆賊卽於明日報渡臣言宜提一旅星馳而
前張疑聲討尙冀桑榆之收無如不聽何賊日遣僞官匝月

餘郡皆失是誰之過歟有詔奪官候勘以郭景昌代之二十三日尙智叛降於賊於是懋德誓師於太原布政使趙建極監司毛文炳蘭剛中畢拱辰太原知府孫康周署陽曲事長史范志泰等官吏軍民咸在懋德哭衆皆哭罷官命適至或請出城候代懋德不可曰吾已辦一死矣景昌卽至吾亦與俱死調陽和兵三千協守東門剛中慮其內應移之南關之外遣部將張雄分守新南門召中軍副總兵應時盛入參謀議懋德等登城二月五日賊至城下遣部將牛勇朱孔訓王永魁出戰死之明日自成具鹵簿督衆攻城陽和兵叛降賊又明日晝晦懋德草遺表須臾大風起拔木揚沙調張雄守

大南門雄已縋城出降語其黨曰城東南角火器火藥皆在我下卽焚樓夜中火起風轉烈守者皆散賊登城懋德北面再拜出遺表付友人賈士璋間道達京師語人曰吾學道有年已勘了死生今日吾致命時也卽自剄麾下持之時盛請下城巷戰顧懋德曰上馬懋德上馬時盛持矛突殺賊數十人至炭市口賊騎充斥時盛呼曰出西門懋德遽下馬曰我當死封疆諸君自去衆復擁懋德上馬至水西門懋德叱曰諸君欲陷我不忠耶復下馬據地坐時盛已出城殺妻子還顧不見復斫門入語懋德曰請與公俱死遂偕至三立祠懋德就縊未絕時盛釋甲加其肩乃絕時盛取弓弦自經自懋

德而下太原死事凡四十有六人賊皆尸之城上自成恨懋
德之不降也驗其尸以刃斷頸而去福王時諡忠襄明史
王燾字濬仲崑山人少孤貧九歲爲人後族人有謀其產者燾
舉以讓之迎養嗣祖母及母惟謹萬歷末舉於鄉由教諭歷
隨州知州州經羣盜焚掠戶不滿千燾訓民兵繕守具土寇
李良喬爲亂殲滅之十年正月大賊奄至燾且守且戰擊斬
三百餘人賊攻益力相持二十餘日天大風雪守者多散燾
知必敗入署整冠帶自經賊焚其署火獨不及燾死所屍直
立不仆賊望見駭走己覓州印得之燾所立尺土下事聞贈
太常少卿福王時賜諡烈愍建雙忠祠與同邑蔡懋德並祠

明史

張大復字元長父維翰少卽訓以經史漢魏唐宋諸家故大復
學有源本其爲文空明駘宕極其意之所至而一規於法於
是名聲日起問字者常滿戶外名公鉅卿爭相延致父歿哀
毀過當內目喪明人咸惜之然性好讀書不以盲廢時或垂
簾瞑坐服習其已讀之書有不屬卽令嗣子桐維誦於側所
著有梅花草堂集崑山人物傳縣志
歸昌世字文休有光孫十歲能爲詩歌稍長有聲詞苑與李流
芳王志堅稱三才子屢困諸生遂棄舉業發憤爲古文詞中
年益放意於詩和陶諸篇爲程嘉燧所稱善草書更精墨竹

風流儒雅易直近人而身遭世變歔歔飲泣以乙酉九月卒年七十二自訂平生所作詩十卷又雜文百餘篇子繼登崇禎癸酉舉人長興教諭少子莊字元恭工詩文善行草書墨竹爲人嗜酒豪放不羈國變後棄去諸生野服終身有恒軒

集山游詩 錢謙益誌 參縣志

顧同應字仲從紹芳子生十歲而孤哀毀如成人長而穎敏好學精舉子業工詩文爲諸生七試不售雨中副榜以父日講恩蔭補國子生尋卒年四十三同應性闊達家雖貧好施與卒之日戚友哭之幾於罷市所著有藥房秋嘯等集長子緇字遐篆天才俊逸好談經濟崇禎癸酉舉於鄉年未四十卒

王志堅傳參陳濟生啓禎遺詩傳

龔挺字季弘所居僅蔽風雨下帷讀書兼工行草其書每借之人作行草謝之挾輿摘微號稱博雅著書數萬言性挺遂急人之難人尤高其義 通志

張雲龍崑山人能文章有至性母病割臂和藥以進居母喪哀慟感里閭邑遇災祲能任其役調度周悉惠澤均平有司旌其門曰孝義同里朱應芳割股療父疾又有九大中以父母病先後割胸股者再有司並旌其門 通志

顧錫疇字九疇崑山人 縣志嘉魚知縣天敘子 年十三以諸生試南京魏

國公以女女之第萬歷四十七年進士改庶吉士授檢討天

啓四年魏忠賢勢大熾錫疇偕給事中董承業典試福建程策大有譏刺忠賢黨遂指爲東林兩人並降調已更削籍崇禎初名復故官歷遷國子祭酒疏請復積分法禮官格不行錫疇復申言之且請擇監生爲州縣長已請正從祀位次進士爲國子博士者得與考選帝並允行省親歸乞在籍終養服除起少詹事進詹事拜禮部左侍郎署部事帝嘗召對問理財用人錫疇退列陳用人五失曰銓敘無法文網太峻議論太多資格太拘鼓舞未至請先令用人之地一清其源精心鑑別隨才器使一善也赦小過而不終廢棄二善也省議論而專責成三善也拔異才而不拘常格四善也急獎勵

而寬督責五善也未極陳耗財之弊仍歸本於用人帝善其奏楊嗣昌疏請撫流寇有樂天者保天下及善戰服上刑語錫疇抗言此諸侯交鄰事稱引不倫與嗣昌大忤嗣昌秉政諸詞臣多攻之嗣昌頗疑錫疇會駙馬都尉王昺有罪錫疇擬輕典嗣昌搆之遂削其籍十五年廷臣交薦起爲南京禮部左侍郎福王立進本部尙書時尊福恭王爲恭皇帝將議廟祀錫疇請別立專廟俄請補建文帝廟諡景皇帝廟號及建文朝忠臣贈諡並從之溫體仁之卒也特諡文忠而文震孟羅喻義姚希孟呂維祺皆不獲諡錫疇言體仁得君行政最專且久其負先帝罪大且深乞將文忠之諡或削或改而

補震孟諸臣庶天下有所勸懲報可遂謚諸人削體仁謚吏部尚書張慎言去位代者徐石麒未至命錫疇攝之時馬士英當國錫疇雅不與合給事中章正震熊汝霖劾之遂乞祭南海去明年春御史張孫振力頌體仁功請復故諡遂勒錫疇致仕南都失守錫疇鄉邑亦破時方遭父喪聞關赴閩唐王命以故官力辭不拜寓居溫州江心寺總兵賀君堯撻辱諸生錫疇將論劾君堯夜使人殺之投屍於江溫人覓之三日乃得棺殮

明史

葉重華字德元文莊公盛六世孫崇禎戊辰進士授工部主事歷禮部郎中出為浙江參議改分守河南睢陳遷山東副使

分巡濟寧歲旱大饑捐俸設糜賑之流寇李青山劫奪漕艘山左震動重華與總督張國維討之擒馘千人轉廣東分巡惠潮值姜世英寇潮會兩省官兵搗其巢世英力困就縛乃賄權要冀以降人例得官重華持不可中夜屏人上書制府詰旦設備引之入見併其黨姜大頭等驅出斬之遷廣西按察使未赴轉太常少卿謝歸年六十九卒兄國華字德榮萬歷乙卯舉人由定海教諭歷國子助教刑工二部主事歸國華精於詩力掃王李鍾譚之習工書法行草八分皆妙次子奕苞字九來亦以工詩善書稱

舊府志參縣志

朱天麟字游初崑山人

舊府志世居吳江為農家至天麟始徙崑山幼好學家貧無力從師年十歲隨

父之黎里道士陸逸庵者朱戚屬也欲留之讀書父不可攜歸越二日天麟潛附鬻薪舟往黎里家人促之使還曰吾豈肯以農夫沒世乎逸庵亦勸學甚力延名師教之八年而學成崇禎元年進士授饒州推官有惠政考選入都貧不能行賂擬授部曹帝御經筵講官並為稱屈及臨軒親試乃改翰林編修十七年正月奉命祭淮王抵山東而京師陷及南都破走福州唐王擢少詹事署國子監事天麟見鄭芝龍跋扈乞假至廣東聞汀州變又走廣西入安平土州順治四年永明王居武岡以禮部侍郎召天麟疏請王自將倡率諸鎮毋坐失事機辭不至明年王在南寧擢禮部尚書尋拜東閣大學士天麟請親率土兵略江右不聽乃趨謁王會李成棟反大清奉王駐肇慶天麟謂機

可乘復勸王亟頒親征詔規取中原王優詔荅之當是時朝臣各樹黨分為吳楚主吳者天麟張孝起吳貞毓李成楫堵允錫王化澄萬翔程源郭之奇皆內結馬吉翔外結陳邦傳主楚者袁彭年丁時魁蒙正發劉湘客金堡皆外結瞿式耜內結李元允彭年等謀攻去吉翔邦傳權可獨擅也而堡居言路有鋒氣乃疏陳八事劾慶國公邦傳十可斬文安侯吉翔司禮中官龐天壽大學士嚴起恒王化澄與焉起恒化澄乞去天麟奏留之堡與給事中時魁等復相繼劾起恒吉翔天壽無已太后召天麟面諭武岡危難賴吉翔左右令擬諭嚴責堡等天麟為兩解卒未嘗罪言者而彭年輩怒不止王

知羣臣水火甚令盟於太廟然黨益固不能解明年春邦傳
訐堡官臨清嘗降流賊受其職且請堡爲己監軍天麟因擬
諭譏堡堡大憤時魁乃鼓言官十六人詣閣詆天麟至登殿
陛大譁棄官擲印而出王急取還天麟所擬而罷天麟遂辭
位王慰留再三不可陛辭叩頭泣王亦泣曰卿去余益孤矣
天麟移居慶遠化澄貪鄙無物望亦爲時魁等所攻去王乃
召何吾騶黃士俊入輔未幾吾騶亦爲堡等排去獨士俊起
恒在乃復召天麟天麟不至七年春時魁堡等下獄謫戍王
乃再召天麟天麟疏言年來百爾構爭盡壞實事昔宋高宗
航海猶有退步今則何地可退當奮然自將文武諸臣盡擐

甲冑臣亦抽峒丁擇土豪募水手經略嶺北湖南爲六軍倡
若徒責票擬以爲主持政本今政本安在乎時 大兵益逼
孫可望請王赴雲南初起恒持可望封天麟及化澄獨謂宜
許及可望使至天麟力請從之諸臣以起恒被殺故皆不可
天麟乃奉命經略左右兩江土司以爲勤王之助兵未集

大兵逼南寧王倉皇出走天麟扶病從之明年四月抵廣南

王已先駐安龍天麟病劇不能入覲卒於西坂村

明史 舊志贈天麟

少保諡文靖二子宿垣字日生斗垣字月生俱隨父跋履瘴
癘宿垣先卒斗垣後五年罵賊張勝遇害於昆明之德勝橋

顧咸正字端木大學士鼎臣曾孫崇禎六年舉人十三年以會
試副榜除延安府推官延安爲流賊所自起連年大旱民多

死或爲盜咸正招流民開荒地田之無主者立爲官莊出私
錢募人種之其年雨大熟明年益墾田至二萬畝又教民引
水鑿池穿井作恒升車及捕蝗諸法奉檄督兵追賊朱明才
等三百餘人至直羅盡殲之招降獬賊張成儒丁世蕃慶陽
土賊潘自安等治績甚著流賊陷西安郡兵皆散賊執咸正
欲降之不屈拘之營中賊敗南歸會雲間事起錄其黨姓名
首及咸正乃與同事四十餘人事具長洲劉曙傳並死子天遠字大
鴻貢生天遴字仲熊諸生以藏陳子龍故俱死歸莊傳
顧咸建字漢石咸正弟崇禎十六年進士授錢塘知縣甫之官
聞京師陷人情洶洶咸建戢奸究嚴警備巡按御史彭遇颯

以貪殘激變賴咸建調護事寧而民免株連及南都失守鎮
江守將鄭彩等率衆還閩緣道劫掠咸建出私財迎犒乃斂
威去亡何馬士英擁兵至頃之大將方國安兵亦至咸建謀
於上官先期遣使行賂兵乃不入城四鄉多被淫掠城中得
無擾時監司及郡縣長吏悉逋竄咸建散遣妻子獨守官不
去潞王旣降咸建不至尋被執死之明史逸史云大兵旣至巡撫張秉貞懼擾不知所爲總兵陳洪範勸之納款咸建爭之不能得秉貞遂挾潞王出降咸建棄官去大帥遣騎追及於吳江執送杭州杭詞不屈閏六月朔殺於清忠坊士民徒跣號泣懸首城樓一繩不集閩中贈太僕少卿諡忠節縣志云弟咸受字幼疏天啓甲子舉人乙酉城破亦死於兵

陳用極字明仲少以氣節自矜中年折節讀書爲諸生南都建

以保舉授工部司務加職方主事從侍郎左懋第通好

本朝遣歸至滄州復飛騎追還幕中士多引去用極曰見危避
難非夫也遂同館太醫院順治二年閏六月十九日執見攝

政王懋第用極俱南向坐勸之降不屈與游擊王一斌都司

張良佐劉統王廷佐俱見殺門人山陽咸默與故人子同邑

徐元敷潛收用極屍焚之負骨歸作北使殉節實錄明史左懋第傳

參蘇志北使殉節實錄

萬亨字元禮萬歷戊午舉人由婺源教諭陞西平知縣時河

南郡邑所在被寇萬亨修備甚嚴居三年改知夏邑夏邑地

小民疲不可以用兵賊嘗頓兵城下萬亨開門解諭之而去

劉超叛於永城督師丁啓睿率河南軍討之詣道援者且數

萬軍資器械不缺於供萬亨力也福王立迎太后於河南擢

江西布政使言者以爲驟改僉事分巡南昌瑞州保寧王避

寇南昌其舍人豪橫萬亨執而笞之府中人皆持白梃作難

百姓起鬪將焚王府萬亨諭之始定尋陞按察使署布政使

事南都潰萬亨奉其母至撫州屬於門生聞南昌失守乃入

建昌奉益王監國建昌破萬亨被執妻顧子婦陸一孫一孫

女先赴水死僕婢死者復十餘人大帥金聲桓欲降之萬亨

書絕命詞見志械至武昌與副使王養正知府王棫推官劉

允浩史夏隆等俱死傳首江西棄屍城下武昌人收葬之於

沌砦河

明史忠烈紀實合纂

王佐才字南陽嘗官狼山副總兵年老家居 大兵下江南崑山鄉紳朱天麟倡議拒守時縣丞閻茂才已遣使迎降用爲知縣縣人共執茂才殺之迎故令楊永言主縣事貢生陳大任議迎佐才爲帥虛所居爲帥府身自被甲署行伍諸生朱集璜陶琰及故儀封令周室瑜等共舉兵助之參將陳宏勛率壯士百人至以爲右帥 大兵至宏勛率舟師迎戰敗還遊擊孫志尹戰歿佐才登城死守七月六日大雨城陷天麟狼狽走福建永言亦遁去佐才縱民出走而已冠帶坐帥府被殺大任時已出城語從者曰同起事而我獨免非夫也復

入死之妻張氏子思翰皆死

朱集璜字以發崑山貢生

縣志三十始爲諸生崇禎乙亥拔貢

學行爲鄉里所推

教授弟子至數百人留心世務先是嘉定崇禎二縣不轉漕崇禎中以軍興乏餉令崑山太倉長洲吳縣代輸而二邑償其直崑山輸粟萬二千餘石直不能盡償民大困集璜致書同郡縉紳曰邑中利害有大於是者乎夫二邑之不轉漕非倖也已輸直於正稅矣今以額外增之民安得不病白其事上官除四州縣之累而二邑卒亦不轉漕邑東南有夏駕河又南爲雞鳴塘並承太湖吳淞之委海潮擁沙漸爲平陸邑往往病水集璜相度地形徐議開濬之法於邑令楊永言親

為庀材督役復水故道凡六閱月而工竣民大利之崑山起
兵助王佐才城守城潰書絕命詞投東禪寺後河死

徐枋撰傳曰學

者私諡節孝先生所著門人孫道民張謙同日死
有觀復堂集二十卷

陶琰字主穉邑諸生師事同里蔡懋德與朱集璜友善相礪以

實學琰世居雞鳴塘去城二十餘里 大兵臨城琰方率鄉

勇三百餘人赴援未至聞城陷乃還歎曰以發其死矣夜自

縊其子藁葬於祖墓之側越數日集璜柩至以兵梗不得葬

亦瘞於琰之右時人為之語曰朱斷斷陶植植生同學死同

穴

周室瑜字服堅天啓丁卯舉人授儀封知縣罷歸為人有膽力

起兵守東門與子朝鑛執戈司餉城破率家人操刃以待兵

入輒殲之朝鑛亦奮劍斫傷數人既而鐵騎四圍登屋發矢

如雨父子同遇害室瑜妻諸氏被執不屈死朝鑛妻王氏自

縊其他守城死者蘇達道莊萬程陸世鏜鬪死者陸雲將歸

之甲周復培罵兵死者陸彥冲代父死者沈徵憲朱國軾救

母死者徐洺自盡者徐澂王在中吳行貞

已上王佐才以下諸人皆見明史及

忠烈紀實

王熠慶字鳳翔天性孝友好施德於鄉里乙酉嬰城戰里人推
為裨長力鬪死妻張自沈山塘涇太倉陳瑚誌其墓曰義士

舊府志

胡甲桂字秋卿崑山人崇禎十二年以鄉試副榜貢入國學授
南昌通判遷永州同知以道梗改廣信至則南昌袁州吉安
俱失廣信止疲卒千人士民多竄徙會黃道周以募兵至相
與議城守已而道周敗歿勢益孤甲桂效死不去城破被執
諭降不從幽別室自經死

明史

周室琳字韞美祖御史元暉爲里仇所許逮詔獄室琳連疏伏
額青衫草履日拜長安門而哭行道傷心由是臺省交章論
救事得白嘗拾遺金五百雪中停車返諸其人

通志

諸永明字合甫壽賢之從孫爲諸生慷慨負大節嘗遊京師時
黃道周下詔獄上書論救者皆得罪親友莫敢候問永明獨

攜衣食炭藥潛遺獄中道周初不相識大驚邀見獄中曰纍
臣行就誅矣君何人復何所望而乃爲此永明曰吾自慕先
生道耳他何所望言已相對大哭爲邏者所覺不得出遂留
獄中與道周同起居朝夕問道後數月道周事稍解永明始
得脫公卿皆稱其賢薦爲翰林院待詔永明曰吾從黃先生
於獄豈以求官耶卒不就人益重之

孫志

孫元凱字若士與太倉顧夢麟常熟楊彝並以諸生持文柄爲
詩學昌黎古文詞嚴峭近柳州天性高介史可法開禮賢館
聘主其事具題予職辭弗受讀書賦詩以終

通志

本朝

○顧炎武字寧人初名絳贊善紹芳孫諸生同應仲子出後從叔同吉生稟異質自幼篤志古學九經諸史皆能背誦年十四爲諸生入復社有名明季屢試不遇見時多故遂棄去舉業屏居山中講求經世之學取家藏經史累朝實錄及天下郡縣志書一代奏疏文集徧閱之有得卽錄積四十餘帙名曰天下郡國利病書後以貢薦授兵部司務再薦職方主事皆不就明亡後絕意仕進北游齊魯燕趙西入關中所至交其賢豪長者考其山川風俗古今治亂之迹證以金石碑碣自是聞見益廣凡所論述皆上下古今貫穿精核卓然成一家言當代咸推爲通儒性耿介絕俗少與同邑歸莊齊名有

歸奇顧怪之目嗣母王未嫁守節及聞國變不食而卒臨終誠炎武以世食明祿毋仕二姓炎武奉母教勵節終身每念故國舊君發爲詩歌悲壯激烈展謁諸陵至於再三晚寓關中庚申元日作一對曰六十年前二聖升遐之歲三千里外孤忠未死之人其老而彌篤如此卒年七十無子學者稱亭林先生所著書共數十種日知錄三十二卷積三十餘年而成於經義史學官方吏治財賦典禮輿地藝文之屬一一疏通其源流考正其誤謬最有補於學術世道者於六書音義尤有獨得撰古音表三卷易音三卷詩本音十卷唐韻正二十卷音論三卷統名音學五書大學士李光地以爲自漢晉

以來所未有二書皆久行於世又文集六卷詩集五卷并左傳杜解補正九經誤字石經考金石文字記吳才老韻補正昌平山水記等諸雜著皆門人潘耒梓行其天下郡國利病書一百卷肇域記一百卷及二十一史年表歷代宅京記等書又百餘卷並藏其甥徐乾學家今多散佚

○徐開任字季重太常少卿應聘孫爲諸生有名鼎革後杜門著述歷數十年從子乾學元文位通顯貽書惟勗以砥勵名節高風介節與吳門徐枋同里朱用純並爲鄉邦所推重留心明史仿晦庵義例輯名臣言行錄貫穿精核於門戶邪正奏議譜牒歷歷如指掌論詩上溯風騷所撰樂府及五言記

事詩吳江朱鶴齡稱其原本少陵深情至性激發而出使讀之者流連往復不能自己卒年八十四孫樹庸字去矜康熙

辛未進士官至掌河南道御史有政聲

崑新志彙

○方南龍字豈潛鳳元孫邑諸生事母能養志不使知貧急兄弟之難弗惜以身殉幼卽工詩讀書新瀆數年不入城市值明季無意進取鼎革後遂棄舉子業野服幽棲日與同志唱酬論文以爲樂性耿介親戚中有富貴而不好禮者雖同里絕不往來年八十二無病而卒所著有竹居詩彙來玉堂詞

彙輯錄詩餘圖譜

舊府志

○諸士儼字莊甫明末諸生國變後棄儒冠隱居練水授徒自

給潛心性理之書所著有考道實錄張伯行撫吳時訪求其遺書得之於孫謨歎其踐履篤實得程朱之正傳

崑新志稿

○朱用純字致一號柏廬集璜子年十七補郡諸生越二載遭國變痛父殉難棄去諸生冠服隱居教授以養母潛心四子六經及濂洛關閩之書探索融會務在躬行實踐當路重其人將以博學宏詞薦用純以死自誓作朱布衣傳以見志門弟子來學者先授以小學近思錄舉業外別立講約闡發經史晚年作輟講語示人曰中庸成己成物罔弗由誠然所謂誠者不外乎倫常日用之間今人心中不脫卑鄙二字倫理上只辦得苟且二字以此讀書豈可語於聖賢之學雖日事

講貫奚益哉其箴砭後進嚴切如此生平嚴以律躬不欺暗室每日晨興必謁家祠莊誦孝經一遍病革命設先像扶起再拜以平日所著刪補蔡虛齋易經蒙引及四書講義二書屬其子曰謹藏諸笥吾將以此見先人於地下復語門弟子曰學問在性命事業在忠孝言訖而逝年七十二門人私謚

孝定先生

彭定求撰墓誌參崑新志彙

○葛雲芝字瑞五錫璠孫鼐子年十五為諸生游張溥之門又為張采壻二張皆亟稱之遭國變盡棄所學潛心求道以姚江為宗遍叩諸方知識得其正傳已入山獨棲一室竟日瞑坐見者疑為神仙所著有卧龍山人集容膝居雜錄

徐枋葛瑞五傳

○徐元文字公肅號立齋太僕少卿應聘曾孫少端重有大志與兄乾學秉義倡爲古學順治乙亥進士第一授修撰甚被恩遇會江南奏銷案起奸胥竄名其中謫鑾儀衛經歷居四年事白復爲修撰丁外艱歸康熙己酉起元官進侍讀主試陝西所錄多單寒力學之士明年遷國子祭酒尋充經筵講官元文以養士莫大於太學極陳納粟之弊請做順治時舊例於郡邑各庠選取文行兼優者及每科鄉試副榜送監肄業部議著爲例在監四年規條嚴肅學政大飭侍講經筵敷陳剴切多所啓沃進內閣學士改翰林學士教習庶吉士丁母憂歸己未

召監修明史仍爲內閣學士庚申擢左都御史時滇孽將平元文疏陳善後之宜以安反側又疏請除三叛虐政俱下九卿議初御史劉安國請察隱占田畝部議凡察出者分別甄錄州縣官利其升敘多捏報累民元文力言其弊凡欺妄害民者請加等科罪自以身總風紀尤以澄肅吏治爲務疏劾福建總督姚啓聖妬功害能啓聖惶恐待罪乃免又條列督撫不職四弊時捐納漸廣吏途益雜元文再疏爭之滇南既定疏言保泰之道詞甚切直事關八旗者人多不敢言元文獨持之嘗劾浙江副都統高國相貌法害民得旨察審將軍馬哈達以民間多匿逃人請自勾攝不移有司元

文不可曰必不得已當令督撫會同將軍
上從其言府部院寺筆帖式三千人求開例捐納典州縣滿大
臣以好言相勸元文力持不可卒從其議而罷二十二年大
計羣吏元文掌計典一切餽遺不敢及門是年舉行軍政請
命提鎮次第入覲以重闔寄是後提鎮悚息多請陞見又言
滿洲漢軍官員丁憂者宜無分內外一體守制二十七月外
官丁憂不許候代治事又請申行律文居喪釋服作樂筵宴
嫁娶之禁候補御史蕭鳴鳳居喪挾妓久不回旗劾罷之在
臺三年數條上便宜知無不言不畏強禦俄坐舉湖北按察
使不當鑄三級將歸有

旨留京專領監修明史二十七年復起左都御史遷刑部尙書
尋改戶部銳意革除舊弊胥吏無所措手部中肅然二十八
年五月拜文華殿大學士仍兼翰林院事明年兩江總督傅
臘塔希忌者意疏劾元文兄弟鄉里事元文奏辨遂力求罷
以原官致仕舟過臨清權關者欲構其罪登舟大索惟圖書
數千卷而已家居未一年病卒年五十八元文立朝三十年
清介剛直始終一節有古大臣風天性孝友篤於師友與兄
乾學並好獎誘後進而性方嚴不苟言笑動必以禮每與其
兄異趨所著有含經堂集三十卷子樹本字道積康熙丁丑

進士官編修

韓菼所撰行
參崑新志彙

○葉方藹字子吉重華子順治己亥進士第三授編修歷陞講
讀學士屢被顧問康熙癸丑

賜宴瀛臺撰八箴以進

聖祖善之命撰太極圖說賜貂裘文綺主己未會試甄拔孤寒
謝絕請託人服其公會修明史

詔舉博學宏詞特命校閱試卷宿學無不中選累遷刑部右侍

郎卒於官贈禮部侍郎賜金營葬諡文敏子淳字淵發康熙

戊辰進士官檢討淳厚長者貌如其心

崑新志彙

○徐與喬字揚貢明刑部主事申之後少從朱集璜游肆力經
學及古文辭順治辛丑成進士以奏銷註誤遂絕意仕進專

事著述取經史子集有關世道人心爲文章根柢者採擇評

註以類相從歷數年而成名曰辨體學者稱之卒年七十三

崑新志彙

○蔡方炳字九霞號息關懋德次子少補長洲諸生性嗜學博

涉羣書於理學政治典故多所纂輯兼工篆草兄方燿字涵

之痛父殉闖賊之難絕意仕進隱居以老雖屢空不肯干人

卒日貧無以殮

通志

○盛符升字珍示康熙甲辰進士授內閣中書陞禮部主事擢
監察御史尋罷歸己卯

聖祖南巡符升年已八十五獻兩京賦三駕平朔賦會同館賦

御書年登大耄四字賜之明年卒符升少師事雲間夏允彝太倉張溥鄉舉出新城王士正之門早有文譽耄而好學著述甚富有誠齋詩藁及崑山志

崑新志藁

○徐乾學字原一號健庵八歲能文爲顧錫疇所知十三通五經康熙庚戌進士第三授編修壬子主試順天乾學常病士子治經義不務實學專趨時好人材日壞至是苦心搜閱拔韓菼於遺卷中明年菼遂魁天下文體爲之一變世服其藻鑑之精陞右贊善丁內艱歸以近世喪葬禮闕不講輯成讀禮通考一書其詳備古未有也服除補故官充日講起居注官明史總裁歷陞侍講學士詹事內閣學士教習庶吉士轉

禮部侍郎一切禮制酌古準今有不便者多所釐正奉命總裁一統志會典及明史纂輯鑒古輯覽古文淵鑒凡著作之任無不領尋充

經筵講官陞左都御史飭臺綱察軍政劾罷江西河南兩巡撫及山西甘肅總兵官時方分南北黨諸御史倚乾學彈劾不避結怨益深在臺五月充戊辰會試總裁卽闈中轉刑部尙書出甫就職會湖廣巡撫張汧以罪被逮誣乾學嘗通賄事白上疏乞歸

上不聽去令解部務仍領各館總裁明年復爲副都御史許三禮所劾再疏乞歸

蘇州府志 卷之六十一
命攜一統志宋元通鑑卽家編輯總督傅臘塔疏論其子姪家人居鄉不法事

上置不問後又坐瀕縣令朱敦厚事落職甲戌卒於家有

旨名用已不及矣乾學慷慨有大志生平敦兄弟之好急友朋之難尤勤於獎進人物海內之士輻湊其門名旣高而又與有力者不相下故卒爲其所逐爲文章原本經史旁通諸子百家開闔變化歸於妥適傳是樓藏書甲天下梓行唐宋以來先儒經解尤有功於學者所著讀禮通考一百二十卷澹

園集三十卷其他著述甚多

韓炎所撰行狀
參崑新志彙

○徐秉義字彥和生而嶷重與兄乾學弟元文相切劘攻舉子

業務闡發經傳微旨康熙癸丑會試第二殿試第三授編修

乙卯典試浙江一時名士蒐羅殆盡升中允以兄弟並在華省深懷謙退移疾歸杜門著述及兄弟歿後始復被

名歷陞詹事充一統志律例諸館總裁壬午主順天鄉試得士如浙闈遷內閣學士予告歸乙酉

聖祖南巡御書恭謹老成四大字賜之卒年七十九所著有培

林堂集

通志崑新
志彙合纂

○王喆生字醇叔明舉人志長孫少孤母朱撫之成立師事朱用純能得其傳康熙丁巳舉順天鄉試第一壬戌成進士選庶吉士授編修乙丑充會試同考官所拔皆知名士事竣卽

乞假養母歸絕意仕進讀書敦行品望日重兩任邑中清田
事先後為巡撫趙士麟宋犖所推重表章前哲扶植桑梓每
不遺餘力所著懿言日錄張伯行稱其精深博大比之抑戒
云卒年八十一

通志崑新
志彙合纂

○孫灝如字宏先康熙壬子副榜授蕭縣教諭陞陽信知縣仁
恕化民讞獄平允遇命盜大案夜燭定爰書淚泫泫下紆民
馮某強劫幼女密擒寘法有鬻良馬於陽信者里蠹誣指為
廢所失灝如曰良馬識途過舊里必戀其羣命牽馬過廢門
竟揚尾去遂抵里蠹法罷歸杜門訓徒囊橐蕭然為人樸直
醇謹鄉里重之子倪城雍正庚戌進士由庶吉士授檢討

崑新


志
彙

○葉嗣蔚文莊公盛七世孫父病篤籲天請代無驗潛禱佛前
斫一指和藥以進病尋愈同邑張守禮王仲祥及仲祥從子

開先俱以刲股療親聞

崑新
志彙

○王惠崑山人又同邑汪宗灝顧存儒朱鳳徐麟初吳聲九新
陽人顧松張士仁顧晉錫嚴漢鉦俱雍正乾隆間以孝行旌



文化乙丑

○王惠崑山人又同邑王宗暹爾賓壽未風余繼時吳肇大祿

開其財以陸強燕賺聞

志稟

其祿壽長馬於陽信者里竊誣指為

祿一誅味藥以燕強幸愈同邑張守甄王中翰又中翰發子

○葉嗣蓀文菴公益子世孫父諫黨籛天韻升無錫營蘇對前

志稟

蘇里重之子倪城羅正庚成進士由庶吉士授檢討

